

Koliti Vegenalitini Luhuva Nampa 1 Pauló Gizo Kimimó

Lusa gakó

1 ¹Neza Ómasímini gakotó Izesu Kilistoni aposolo loló itane loko nelémo etó i ve Paulona ligivetehe Sostené ezagi makó nousike ²^a Koliti numutoka Ómasímini vegenala lekelitoka luhuva netá imane gizo nolukumuve. Lekezagi vegená lugáagi numutó namató hamokó Guivahanite Izesu Kilistoni sele li amiaká niago Ómasímo lusa geleetokoko Izesu Kilistotoka gímizemó nenémini agikagú nene apazá minatave loko alesa molo likimi vegená niave.

³Ómasi ametehe aitokatí itó Guivahani Izesu Kilistó aitokatí nasahilí itó hulu lekelitoka mino-loko voko minatize.

Keitoka monolímimi zámuza utó ikumú Ómasi agepoka limó

⁴Ómasi eza Izesu Kilistokumule loko nasahilí lehizeleketakumú neza gelekuke lekelikumú gamena gamena Ómasi agepoka loaká nouve. ⁵Eza monó vávani oko loaká itó geleká haitopaitolímimi hagitana lehizeleketonoimó nene, ⁶Kilistoni gakolámo likigikagú luhusa alekago, ⁷lekeza Guivahanite Izesu Kilistó atiginá oko atikumú ageva iki minake monolímimi zámuza makokumú vitagá isá amave. ⁸Eza Guivahanite Izesu Kilistó anititi gamenaló lihimatini nomitimó minatave loko gizapa oleketoko noiko, gamenatini asú itive. ⁹Ómasi eza gipala Izesu Kilistó Guivahanite nene aitoka miní amitave loko sele lo likimi vémo lokago alévolé oaká ve noive.

Koliti vegená keza monokumule liki hizi hoú lamó

¹⁰Nigivénegita, neza Guivahanite Izesu Kilistoni agulizató lakagata aleko litoze, gililo. Lekeza gakó haitopaitó liki hizi hoú lamilo.

^a 1:2 Apo 18:1

Monokumú nigiliki likigikatini mili hamó iki minalo. ¹¹Náa vegúe, neza likigikagú lova leta gakó utó oko nemó nene Koloeni vegealate likago gelekuve. ^{12^b}Nenemú gakó láa loko noluve. Lekelitokatí makolite leza Pauloni vegejala nune liki likago, makolite leza Apoloni vegejala nune liki likago, makolite leza Pitani vegejala nune liki liaká niave. Itó makolite leza Kilistoni vegejala nune liki liaká niave. ¹³Nenemú nana ive. Kilistó eza hize hoú loleketahe. Itó Paulona neza lekelikumule loko zohota zaló huluhe. Itó neni nugulizalímo avutá okago monó nagamí hilahe. Íi, lá oko nomive. ^{14^c}Neza lamaná monó nagamí hololeketamumóma nenazo, nenemú mulúnegú lamaná noguluve. Ve lositá Kilispoko Gaioko kezagó holoketumóma nene ¹⁵lekelikutí ve makolímo Pauloni agulizalímo avutá nepelekago, monó nagamí hulumóma neve loko lokative loko lá umó neve. ^{16^d}Itó gakó makó noguluze. Setepaná aí vegejala kezagi holoketumó. Lugáa monó nagamí holoketuhe nene ma gelemuve. ¹⁷Kilistó eza vegejá monó nagamí holoketatane loko nimiselemimóma neve. Aí gakó lamaná lo keme keme itane loko lonetonoimóma neve. Itó Kilistó eza zohota zaló hili gokolámini zámuza lemekative loko lekelí likigilikagú apikulú aleko gele guni oaká gakó losá amumóma neve.

Kilistó eza Ómasímini helisa itó geleakaláa noive

¹⁸Zohota zaló hili gakola nene gapo golesagú viaká nia vegejalite gelego ha netá loló oaká noimóza, gapo lamanató novuni vegejá nenete guluko, Ómasilokatí zámuzaalagi gakó neve loko gelenoune. ^{19^e}Nenemú monó gotolaú Ómasímo li gakó makó láa liki luhuva gizinamóma neve:

Leza gele guni oko matute koló onoive liki liaká nia vegejalitini gakoíni ale golesa inogo uve.

Itó sukulu napa lokunike gele vevesoaká nune liki liaká nia vegejalitini geleakáini nene gele ahulatove.

^{20^f}Ómasímo monó gelema vegejalitini geleakáinimú nene ha gakó neve loko gelekamó nenazo, nenemú gili guni iaká nia vegejalitini gakoíni hí neve. Itó monó mogona apí ikimiaká nia vegejalitini gakoíni hí neve. Itó itína gamenámini mogonamú gakó hoza lita vetini gakoíni nene hí neve.

²¹Itó Ómasímini gele vevesoakalímini zámuza utó noigo, vegejá kezáini geleaká nenetunú Ómasímini mogona ániganigi ángi vevesamamó. Nenemú Ómasímo giligo etokago, monó gakola lo kemehá nene vegejá makolite gelego ha netá loló noimó nene vegejá makó lo kemekuko, gili alévolé niago, Ómasímo kugutó vizeaká noive. ²²Zuta vegejá neni zuha keza haitó suni utó iko ángatune liki amuza miliaká niave. Itó Kiliki

^b 1:12 Apo 18:24 ^c 1:14 Apo 18:8; Lom 16:23 ^d 1:16 1 Koli 16:15 ^e 1:19 Isa 29:14

^f 1:20 Hio 12:17; Isa 19:12, 33:18, 44:25

vegená keza netá mogonamú gilinigi gumonó hiziki miniaká niamóza, ²³leza nene Kilistoni nene zohota zaló apili hele gakó lokuko, Zuta vegená keza gelego gena oaká noive, itó Kiliki vegená keza gelego, negi gakó loló oaká noimóza, ²⁴Ómasímo kelémo mola vegená Zuta ve niamó Kiliki ve niamó keza nene Kilistó zohota zaló hili gakokumú gelemó nene, Ómasímimi helisa itó Ómasímimi gele vevesoakaláa nene áminagutí utó oaká noive. ²⁵Vegená keza Ómasímimi hozamú negi netá neve nilago, ámina negi netalímo vegenalitini gelekáini avilegeaká noive. Itó Ómasímimi mogonamú zámuzala nomive nilago, ámina zámuza nomi netalímo vegenalitini zámuza avilegeaká noive.

²⁶Nigivénegita, Ómasímo ve nanámimi sele lo likimimóma neve. Nenegú ánikiki gililo. Monó gelema vegenalite lekelikumú láa liki giliaká niave: Gili vevesi minamoláa mukí minamave. Itó zámuzagi minamoláa mukí minamave. Itó getakutí itiki minamoláa mukí minamave. ²⁷Liki linamóza, vegená kovogisaló negi niamoláa leza Ómasímo lelémo etó imó nene, gele guni onoune liki liaká a vegená kovoza hilitive loko alesá molo limimó neve. Itó vegená kovogisaló keé lamunimoláa leza Ómasímo lelémo etó imó nene, zámuzáinigi vegená keza kovoza hilitive loko alesá molo limimó neve. ²⁸Itó vegená kovogisaló gohogó vegená nounimoláa itó vegená kovogisaló guhalehale oko nounimoláa lezagi Ómasímo sele lo limimó nene kovogisagi vegenalitini lukesaváini akilitave loko sele lo limimó neve. ²⁹Lá okago, mikasiuka ve makolímo Ómasímimi avogisaló agupe aleko iteminogo ive. ³⁰Ómasi eza Izesu Kilistotoka miní ameleketonoimóma neve. Kilistoni nene gele vevesatunitímimi mogona minative loko, itó lihimate asú olimikiko minatunitímimi mogona minative loko, itó lihimate ale ahulolimikiko ligika avova liko minatunitímimi mogona minative loko, itó lelí lihimagutí gologí oletative loko amiseleletamó. ³¹^s Nenemú gakó makó monó gotolaú láa liki luhuva gizinamó nene alévolé itive:

Vegená makó nenete sigaga liki agepoka linigima Guivahanimukó litaze.

Pauló Kilistoni apele gakokó lo kimimó

2 ¹Nigivénegita, neza lekelitoka anitumó nene, Ómasímimi asuguná gakó lo likimitove loko nene, vegenalite sigaga lita gakó negopa, itó není gele vevesoakaláa negopa, ²neza láa loko lo hukouke vumóma neve: Neza lekelitoka vinake gakó lugáa laminake, Izesu Kilistoni zohota zaló apelemó nene gakokó lo likimitove loko vumóma neve. ³^h Itó lekelitoka voko minumó nene keé lamuke nehelele vizigo luvoluvo zeko minumó neve. ⁴Lá oko nouke, monó gakó lumó nene lakagata alitove loko

^s 1:31 Zel 9:24 ^h 2:3 Apo 18:9

mikasiuka vegealite gili vevesina gakokutí lo lekememuve. Ómasímini zámuzámo itó Sikalahulímo neni gakó hize lé okago, gihila zeaká imole. ⁵Lá umó nene lekeza Ómasímú gili alévolé itamó nenémo vegealite gili vevesiakakú negopa, Ómasímini zámuzagú leheta itive loko lá umóma neve.

Ómasímini asuguná gakó Sikalahulímo lo utó oaká noive

⁶Neza lamaná monokú olopa iki mina vegeaná nene gele vevesoaká gakokutí lo kemeaká noumóza, imane mikasiuka monó gelema vegealite gili vevesiaká gakó itó kugulizaki ve hiliki haha ita ve nenete gili vevesiaká gakó liaká niamó nenéminoko losá amuve. ⁷Neza Ómasímini asuguná gakó halá geko minamó nene lo utó oaká nouve. Ámina gakó nene vegeaná leza gonanalivagi loló oko minatune loko gozapá netá matá ale utó amike mina zupa Ómasímo ale vavá oko mololetamó. ⁸Mikasiuka kugulizaki ve nenete ámina gele vevesoaká gakó mogona gili vevesamamó. Gili vevesalina nene, lelí Guivahani lapaná amelahini nene zohota zaló apelemaline. ⁹ⁱ Lá onoimóza, gakó makó láa liki luhuva gizinamóma neve:

Vegealite ánigama netá, itó kagatatunú gelema netá, itó
vegealitiní kigikámo gelemi netá nene, Ómasímo kigika aminita
vegeaná nene ale vavá oketonoimó neve,

¹⁰liki luhuva gizinamómáminoko Ómasímo Sikalahuni amiselekago, ámina netakumú lo utó o lemeaká noive. Sikalahulímo netá matalímini mogona itó Ómasímini mogona halá geko minamolagi geleaká noive. ¹¹Hí vémo nene agivelahini agikámini mogona geleneive. Ezáa agikámini amelahogó geleaká noive. Ámináminoko Ómasímini agikámini mogona nene Ómasímini Sikalahulímo hamokó eza geleaká noive. ¹²Itó Sikalahú nene monó gelema vegeatokatí alemuháma neve. Leza Ómasímo monó asapulagi lehizeletamó nene gele vevesatune loko Ómasímini Sikalahula aluháma neve. ¹³Leza monó asapulagi aluhá nenemú logele hagele oaká nounimó nene, hanuva vegealite kezáini geleakáinitunú li limikago negopa, Sikalahulímo lo lemekago lo kemeaká noune. Itó Sikalahulímini anó lupamú giliaká nia vegeaná nene monó lo kemekugo giliaká niave. ¹⁴Ve makó Sikalahuki minamita vegeaná keza Ómasímini Sikalahulímini gakó ma geleminigave. Keza nana netáinigutí gilitave. Nomive. Sikalahú alina vegealite gilitamoláa oko nenazo, Sikalahuki minamita vegealite giliko negi gakó loló inogo ive. ¹⁵Sikalahuki minata vegeanakó netá mukilímini mogonamú hanuva gili vevesanigi niamóza, ve makolímo kef mogonataganamú lotuva legeminogo ive. ¹⁶^j Nenemú gakó láa liki luhuva gizinamó nene gihila neve:

ⁱ 2:9 Isa 64:4 ^j 2:16 Isa 40:13

Guivahanímini agikagú gakó nemó nene éaho gilitimó neve.

Gakó akó noligo nene hí vémo alémo vatí igo limó neve. Ma nomive.

Ma nomimóza, leza nene Kilistoni geleakaláámini oko nominune.

Koliti vegená keza Ómasímini hozaló vegená lilí iki minamó

3 ¹Nigive nagavese, neza lekelitoka vuke, ve Sikalahúinigi lo kemeaká noumola nenéminoko lo lekememuve. Lekeza monokú nene alévolé amake Kilistoni izegipa namunigitana iki niago, neza ve Sikalahunigi nomi vegená lo kemeakaláa nene lo lukumumó. ²^k Neza likigikámini nosá alévoleláa lekememuke hanuva aminíma lukumumóma neve. Likigikámini nosá alévoleláa nene nana iki naline. Lekeza litaha lekemetamenigi ha nianazo, itínasa nene nosá alévoleláa nata avotigí iki minamave. ³Lekeza nenémináa miniki kemekugú niki lova leta lava leta iki hanuva vegenakitana nenéminiki litaha lekemetamenigi miniaká niave. ⁴^l Lekeza Pauloni vegenala nune itó Apoloni vegenala nune liki liaká nianazo, ve nenémináa lekeza numuká vegitana niave loko loleketanogo uve.

⁵Lekeza lelikumú nanamú hizi hoú liaká niave. Apoloki nezagi hanuva Ómasímini gelekélé izegipalatosa Guivahanímo hoza gakó oletatíminoko monó lo lekemeko nousigo, aikumú gili alévolé inamóma neve. ⁶^m Nénisi lekelitoka hoza aleko ale zuhá umó. Apoló nene liliha aleaká imóza, Ómasímo nene lusaváa gekago gihila zeaká noive. ⁷Nenemú ale zuhá oaká noi vemú lamitune, itó liliha aleaká noi vemú litunimó negopa, lusa gekago gihila zeaká noi ve Ómasímú hamokó litune. ⁸Hoza aleko ale zuhá oaká nou ve itó liliha aleaká noi ve leza hamokó lelegító nousive. Meinaváa nene hoza alusi lelegító etó etó oko alinogo usive. ⁹Leza Ómasímini hozaló veva nousive. Ómasímini minía nene lekelisi niave.

Itó lekeza Ómasímini numuni apala niave. ¹⁰Ómasímo hoza lehizenetamole loko neza numuni geaká ve gihilámina simeni lapusa ale hizumó. Itó nenémini amupiló ve makolite miní amiki numuni giaká niave. Nenémináate gili hee li miniki gitaze. ¹¹Lapusa hizenoumó nemó nene Izesu Kilistoni aí akeleko makó hizeakaláa nomive. ¹²Itó lapusa nenémini amupiló makolímo goli silivá nenetunupe itó meinava iteko mina gehanitunupe itó zasiha lónohani méniha nenetunú gitimó nene, minoko numuni gimó nenémini mogonáa utó inogo ive. ¹³Minoko gamena napaló mogonala utó noitó nene ló napa guluma inogo ive. Itó ló nenémo numuni nigeke hoza alemó nenémini mogona ale utó molanogo ive. ¹⁴Ve makolímo lapusa amupiló numuni gimó nene lolímo lo lamaná amitimó nene eza meinava alinogo ive. ¹⁵Itó ve makolímo numuni gitó

^k 3:2 Hip 5:12-13 ^l 3:4 1 Koli 1:12 ^m 3:6 Apo 18:4-11,24-28

lolímo lo asú itimó nene, Ómasímo aseva zetoko lokutí agutó vizitimóza, eza meinava aleminogo ive.

¹⁶ Lekeza nene Ómasímini monó zavusave niave, itó Ómasímini Sikalahú nene mulutikú minoko aleko oaká noimó nene gelemahe.

¹⁷ Ómasímini monó zavusave nene etó keké vizeko neve, itó aí zavusave lekelisi niave. Nenemú makó keza Ómasímini monó zavusave ali golesa itamó nene, Ómasímo ámináminoko ámina vejená kelémo golesa inogo ive.

¹⁸ Lekeza likigikatini agoka vizemilo. Lekelikutí makolímo monó gelema vejenalitini kovogisaló gele vevesoaká ve nouve loko agata gilitimó nene, ámina gakó gele ahulokoko monó gelema vejenalitini kovogisaló negi ve loló oko minatimó nene Ómasímini agómulaló gele vevesoaká ve minanogo ive. ¹⁹ Mikasiuka monó gelema vejenalite vevesokave liki lita gakó nene Ómasímo gelekiko negi gakó loló inogo ive. Nenemú monó gotolaú Ómasímú gakó makó láa liki luhuva gizinamóma neve:

Monó gelema vejenalitini kogómulaló gili vevesiki mina vejená keza gele vevesonoune liki netá nalemó nene gelehusi gekimikago, áminámini agepagú viki apiliaká niave.

²⁰ Itó makó lá oko neve:

Guivahanímo gele vevesonoune liki liaká nia vejenalite kagata nigele gakó nene ha netá neve loko geleneive.

²¹ Nenemú lekeza vejenalitini kugupe alimi iti iti amilo. Netá matá mukí nene lekelikumule loko mololikimikago neve. ²² Paulona itó Apoló itó Pitá leza nene lekelikumule loko gizapa ahulolimikago noune. Itó mikasiuka netá matá mukí itó minoakape heleakape itó itínasa minati netape itó alika utó iti netá mukí nene lekélí mututoni neve. ²³ Itó lekeza nene Kilistoni mututoni niave, itó Kilistó nene Ómasímini mututoni noive.

Aposolote monó hoza alemó nenémini mogona

4 ¹ Lekeza lelikumú gilikiko, Kilistoni gelekelé ve itó Ómasímini henonímini gizapa ve itó Ómasímini asuguná gakó lole ale ve loló ino. ² Itó henonímini gizapa ve keza hoza amelaho litokó hoza alitave liki linamóma neve. ³ Lá onoimóza, nezánemú litoze. Lekelisihe itó vejená lugáate iki miniki není gakó litamó nene gelekugo gihila loló aminogo ive. Itó nezáne mogonánemú lotuva legeminogo uve. ⁴ Není lihimáne netimó nene gelenamuve. Lá onoimóza, není mogona nene Guivahani hamolímo ale utó inogo inazo, nenemú lihimáne nomimó nouve loko laminogo uve. ⁵ Nenemú lekeza vejenalitini mogonáinimú loakakumú nene litá iki lamilo. Guivahani ezáa atiginá oko ati gamena nene ligikagú

ⁿ 3:16 1 Koli 6:19; 2 Koli 6:16 ^o 3:19 Hio 5:13 ^p 3:20 Age 94:11

asuguná ne netá nene ale lapanató molanogo ive. Itó vejená ligikagú geleká nouni gakó nene ale utó o asú inogo ive. Lá okoko vejenalitini mogonáini ángokoko etatitokó kelémo napa inogo ive.

⁶Nigivénegita, lekeza lelí mogonáa lá iki nánigiki gili hee litave loko gakó nolumó nene Apoloki lezateloka lo moloko noluve. Monokú lá iki minalo loko lo mololeta gakó nene avilegemiki vejená lugáa kilími napa iká itó lugáa alivi letivi iká amilo. ⁷Éaho lokago lukugupe alimi itiaká niave. Lekelitoka netá matá mukí vaí oko nemó nene Ómasímo lekememihe. Óe, Ómasímo netá matá mukí lekeme asú onoimó nenazo, lekeza nanamú gelego Ómasímo netá lekememimó gelegago lezetete ale utó okune liki lukugupe alimi itiaká niave.

⁸Lekeza lekezatanimú láa liki giliaká niave: Lagatupa okago, monolímíni netate vaí oko neve. Pauloge niamago lezategó lugulizaki ve loló oko minoaká noune liki liaká niamóza, Ómasímíni avogisaló lamaná lukugulizaki ve líl ítanazo. Lá iki miniki lelí limimí iki lílmíki vikiko, lekelitoka miní ameko lugulizaki vegó loló oko minatuninazo. ⁹Neza láa loko nagata noguluve: Ómasímo aposolo leza vejenalitini kigilikagú lelémoko lemeko mololetamó gelekave. Lá okago, goní ilimikago lipili ahulatakumú ageva geko nominuhá ve gelekune. Mukitoka ageloge niamó itó mikasiuka vejená niamó keza lelí ángi goselé ikago nouhá gelekave. ¹⁰Leza nene Kilistokumule loko vejenalitini kogómulaló negi ve loló oko nounimóza, lekelisi nene Kilistotoka miní ameko gelekate vaí oko neve liki giliaká niave. Leza keé lamunimóza, lekeza alévolé oko lugulizaki ve noune liki nigelehe. Vegenalite lamaná lelí nene alivi letivi iaká niamóza, lekelí lukugupe alimi itiaká niave. ¹¹Leza nene nosánetakumú zahí nagamikumú gaúna heleko nominune. Lipiliaká niago, ginaganete nomimó numute nomimó minoaká noune. ¹²⁹ Lugupémíni netá utó itive loko lezate ligizanitunú hozaváa alunike ale utó oaká noune. Lelikumú alivi letivi ikago, nónohá zekimiaká noune. Gopoguni mililimikago mukahá osá amune. ¹³Lugulizá ali mumusopa zikago, kelémo hulu oaká noune. Leza izahuza netá loló okunike, vejená mukilitini pipizakitana minoaká noune.

¹⁴Neza lokovoza hilitive loko gakó imane gizamuve. Neza nigika lekemenou gipáne mohóne lakagata aleko luhuva imane nogizuve. ¹⁵Kilistoni monokú apí ikimita ve nene vaí iki nitamóza, ametike mukí niamave. Nénisi Izesu Kilistoni monó lo lukumuke ametipina loló oko nouve. ¹⁶^r Nenemú nene není nigizakagú lisiki némegetatave loko lakagata aluke noluze, gililo. ¹⁷Neza lá itave loko Timotini amiselekugo, lekelitoka novive. Eza nigika amenou ve Guivahanímíni monokú gipáne loló oko minake, mukí netá ale gapoló molokogó aleaká noive. Eza voko

⁹ 4:12 Apo 18:3 ^r 4:16 1 Koli 11:1; Pili 3:17

neza Izesu Kilistotoka gímizeuke gosohá gapoló mohona oaká noumó nene numutó namató aí vejenala zuha lo kemeaká nou gakó goha lo lekemekiko gilitaze. ¹⁸Itó lekelikutí lugáa nenete nenikumú nene aminogo ive liki hokolizá iki gopa miniaká niamóza, ¹⁹Guivahanímo gelekiko, lamaná okikoma, mino hána aminake lekelitoka vinake, ámina hokolizá iki mina vejenalitini gakoláa gelekinake, zámuzáini netihe nomitihe nenémini mogona ale utó inogo uve. ²⁰Ómasímini gizapaló minoakalímini gapo nene gakokú nomíve. Ómasímini zámuzagú nene utó oaká noive. ²¹Itó lekeza nenikumú nanave liki liaká niave. Mukahaki ano liki nilahe, itó nigika lamanaki hulu oko ano liki liaká niave.

Gumesisi netakumú goní oketamó

5 ^{1s} Lekelikumú láa liki lamaná likago gelekuke ininá okuve: Lekelitoka moko netá haitolímini numuká vetitoka utó amoakalímini utó onoimó nene gipalámo amelahini venalagi mihina iaká niasive liki lakumú noluve. ²Itó lekeza netá nenémináa utó onoimó nene lokovoza hiliki lukugupeló gilísá amahe. Lá niake monó vejená nune liki lukugupe aliki otiaká niamó nene etamive. Lekeza miluma giliki lokovoza heleaká noi netá aleaká noi vema nene ali ahulitatanazo. ³Neza nugupetunú hotó nouke nigika lekelitoka nego ámina netá loló i vemú nene vogalatikú noukegitana láa loko lo hukumó: ⁴Lekeza alegesá iki niiko, itó neza nigikatanún gele nolukumugo, Guivahani Izesuni agulizató itó aí zámuzaló ámina ve nene holutikutí amisili ahulataze. ⁵Lá niiki ámina ve nene agupegú miluma geleoko eza litaha agika ahulokiko Guivahani Izesuni gamena alitokiko ámina vémini amenía aseva zetatihe liki Satani agizakú milatave loko nololeketuve.

^{6t} Monotegi vejená nune liki lukugupetini aliki itiaká niamó nenemú gulugo golesa oaká noive. Iza ekesaláa nene netá komámo izavagú holokago gizi vatí amó nene ekesá o asú oaká noimó nene gelemahe. ^{7u} Nenemú ekesalagi ve nene gizaká iki alími ahulikiko, noviko, gihila lagámini lilí ilo. Lekelí ekesá netatini mota gilato asú okamóma neve. Leza Zuta ve avotegini asenini zeketakumú gele minoaká holisi nene sipsip iza nanogo numutegutí ekesá netá ahulo asú okunike ekesá netá nomi peleti noaká nouháza, lelí asele zelimiaká sipsip iza Kilistoni nene lelí lihimamule liki apilinamóma nenazo, ^{8v} nenémini holisiváa minatune loko musi netá hokolizá nenémini ekesá netala ahulo asú okinake, mokoná netalímini gihiláa itó gakó gihila lagáminigó ekesá netala nomimó nene ale mininake holisiváa minatune.

Mokoló vejená ahuloketature

⁹Neza luhuva netá makó gozapá láa loko gizo lukumumóma neve: Lekeza mokoló vejenaki nosá gitigi nímaní iki apiziki minamilo, loko

^s 5:1 Gapo 22:30 ^t 5:6 Gal 5:9 ^u 5:7 Gá 12:5 ^v 5:8 Gá 13:7; Gapo 16:3

loleketonoumóma neve. ¹⁰Láa loko lumó nene monó gelema vegeñalitini mokoló vehe itó makolímini netató áñigo lamaná oaká vehe, itó guminaló vehe itó gipe lakegusani lugeha netá ale miniaká nia vehe, keikumú lamumóma neve. Keí nene mikasi ahulatuni zupahé ahuloketatumó niave. ¹¹Neza néminokomú gizo lukumumóma neve: Monó nogili ve likigivetipo makolímo mokoló mohona itihe itó makolímini netató áñigo lamaná oaká ve noitihe, itó gipe lakegusani lugeha netató minatihe, itó vegeñá kemegeka kamagaka litihe itó negi nagamitokó mohona itihe, itó gumina vaukalokó mohona iti ve nenémináagi apiziki miniki nosánetá namitave loko leleketonoumóma neve. ¹²⁻¹³ ^w Leza monó gelemiki hetoka mina vegeñakumú gakó lo hukoketosá nene lelí hoza nomive. Lekeza holutikú monó nigele vegeñá keí lihimáinímini gakolamú litamó nene lamaná inogo ive. Itó hetoka nia vegeñalitini lihimáinímini gakoláa nene Ómasímo linogo ive. Nenemú monokú gakó láa liki luhuva gizinamó nene gili minalo:

Vegeñá golesa ahulikimikiko holutikú minamino.

Monóini nomi vegeñalitini kovogisalo goní gakó lamilo

6 ¹Lekelitokatí makolímo nene agivelahini lihima ale minatimó eza gakó nene monó vegeñatoka lamoko monóini nomi vegeñatoka noloko goní omiaká noimó nenemú lokovoza helemihe. ²Monó vegeñá leza minoko monóini nomi vegeñalitini gakó lo hukanogo une. Nene ma gelemahe. Itó minoko hoza nenémináa alitave loko leleketonoimóma nenazo, lekelí gakotini hutuva utó okikoma, li hukata avotigila iki minamahe. ³Leza minoko ageló vegeñalitini gakoki lo hukanogo une. Nenemú ha netá utó okikoma, vávani oko hanuva lo hukanogo une. ⁴Ha netá nenémini gakoláa utó okagoma, lekeza nanamú monó guluhá vegeñá leza guluko lemeaká noi vegeñá nenémináa keitoka aliki vikago, li hukilikimiaká niave. ⁵Lekeza gakó imane gilikiko, lokovoza hilitive loko lo nolukumuve. Lekelitokatí ve makó agatagú hee hee lo mina vema noamihe. Itó lekelitoka gakotini utó noikoma, aitoka aliki vikiko, ale hee leleketatimóza, ⁶lekeza nenémini isá amave. Izesuni zuhagutí makolímo agivelahini lihima utó okagoma, monóini nomi vegeñatoka aleko vokago li hukimiaká niave.

⁷Lekelisi eza goní omikago eza goní omikago iaká niamó nenémo monotini aleko lemeaká noive. Likigive lugáate netá golesa aleleketatune liki nilikoma, helegalokagó minatinazo. ⁸Lekeza nene lekezatinigi netá ali gopa iake, gumina vauka niaká niave. Lá niake, monokú ve likigivetikinigi ámina ikimiaká niave.

⁹Netá golesa aliaká nia vegeñalite Ómasímini avogisalo vi hiliakaláa nomive. Nenema gelemahe. Lekeza likigikatini agoka vizemilo. Gumesisi

^w 5:13 Gapo 13:5, 17:7

mokoló vejená itó gipe lakegusani lugeha netató vejená itó ve vená huki ezega emega iaká vejená itó vémohe venalímohe agivelahitoka gímizekiko akiaká nia vejená nenehe, ¹⁰ itó guminatamina vejená itó makolitini netató ániigi lamaná iaká nia vejená, itó negi nagamitó mihina iaká nia vejená itó kemegeka kamagaka liaká nia vejená, itó laskoli, vejená nenémináate Ómasímíni avogisalo vi hilaminigave. ¹¹ Itó lekelikutí vejená lugáa gozapá nenéminiki minamóma nemóza, itína nene likigika nagamí zelikimiake itó ale guluvitolikimiake, Guivahanite Izesu Kilistoni agulizató itó lelí Ómasímíni Sikalahulímíni agulizató lihimatini asú olikimikago niave.

Lukugupémo Ómasímíni agulizá ale otino

¹² ^x Lekeza mukí netá nene gakola nominazo hanuva alesá neve liki liaká niamóza, mukí netá nenémo ma lelémo vatí aminogo ive. Itó lekeza mukí netá nene gakola nominazo hanuva alesá neve liki liaká niamóza, netá makolímó agulizaki ve loló o liminogo noiko gele amemitune. ¹³ Lekeza nene goula nosá nene lagatupámíni netale itó lagatupa nene nosánetakumú neve liki liaká niamóza, minoko Ómasímó nene áminagi áminagi gizo lú nokiko haha inogo ive. Lugupémo nene moko netá aleakakumule loko nomive. Guivahanímíni luhuva utó itive loko neve. Itó Guivahani eza lugupémíni amelaho noive. ¹⁴ Itó Ómasímó Guivahani nene heleneikutí alémo otimó ámina oko zámuzalatumú leza lelémo otinogo ive. ¹⁵ Lukugupetinímó Kilistoni gelekelé oaká noimó nene gilísá amahe. Itó Kilistoni gelekelela eza goha ale viligokoko mokoló venalímíni gelekelé otatihe, olo. Íi, lá oko nomive. ¹⁶ ^y Lekeza láa liki gilísá amahe: Ve makolímó mokoló vená makotoka gímizekikoma, keza kugupenini kigikáini mili hámakó iiki minatáimó neve. Nenémíni luhuva gakó makó láa loko nemóma neve: Keza lositató kugupe kigika hamokó loló okiko apiziki minatáive. ¹⁷ Lá oko nemóza, makó eza Guivahaniloka gímizekiko ezagi kigikáini hamokó loló inogo ive. ¹⁸ Lá onomó nenazo, mokolú netá golisi italo. Ve makolímó netá golesa lugáa alitimó nenémo ezáa agupeló gímizemitimóza, mokoló netalímó netá nenémo ezáa agupe ale golesa inogo ive. ¹⁹ ^z Itó lekeza láa liki gilísá amahe: Lukugupe nene Sikalahulímíni monó zavusave neve. Ómasímó lekelí lukugupémíni agikagú minoko aleko itive loko mololeketonomómoma neve. Lekeza nene likigika lukugupémíni amelage minamanazo, ²⁰ itó lekelí meina hizekamóma nenazo, nenemú lukugupémo Ómasímíni agulizá ale otino.

Ve aleve keí gakó

7 ¹ Lekeza luhuva netá gizi nemeke loká inita netakumú lo utó molatoze, gililo. Ve makolímó vená alemoko hanuva minatove

^x 6:12 1 Koli 10:23 ^y 6:16 Apí 2:24 ^z 6:19 1 Koli 3:16; 2 Koli 6:16

litimó nene lamanale. ²Itó lá onoimóza, moko netakumú gimilegú moloaká netá nenémo vaí oko minokanazo, nenemú ve nene etó etó iki vená aliiki venáinigi minatamó nene vatí oko neve. Itó vená keza ámina iki etó etó iki veló viiki váinigi minatamó nene vatí oko neve. ³Itó ve neneka gugupe nekisa nene venaka mosetamo. Itó ámina oko venalika gugupe nekisa nene vaka mosetamo. ⁴Vená geza gugupémíni netá nene geí nomive. Vakámíni netá neve. Itó ve geza gugupémíni netá nene geí nomive. Venakámíni netá neve. ⁵Vego venako lekeza lukugupetini ali amanapa amilizo. Hanuva Ómasiloka linigi goí iki ligili hagili iiki gamena miliiki mini hotó itái gamenamú litáimó nene, lamaná inogo ive. Milatái gamena asú okiko goha ali apiziiki minalizo. Milatái gamena aviligitáimó nene, Satá eza gimilikú molokative loko noluve. ⁶Ve aleve lilí iki minatave loko lo hukoleketugopa, hanuva gele lukumuke noluve. ⁷Nezáne noutíminiki gohuna minatave loko geleaká noumóza, Ómasímo zámuza haitopaitó lehizeletamó nenazo, makó keza ve aleve lilí itamó, itó makó keza gohuna minatamómámíni zámuza alinamóma neve.

⁸Getó venaki itó gohuna vegi itó gevoná venaki keí gakó nene láa loko noluve. Keza není suni aliki veló vamiki vená alemiki minimi ititamó nene, vatí inogo ive. ⁹Lá itamóza, gumesisi lakagata nene ve vená huko ezega emega oaká lakagata gilitamó nene, ámina netalímíni loláa nenémo lekelémo golesa okatize, ve aleve lilí iki minata sunímo vatí oko neve.

¹⁰Ve aleve lekelí gakó litoze, gililo. Nene není gakokó nomive. Guivahanímíni agepagutí gakó noluve. Vená keza váini ahulikitamino. ¹¹^a Itó váini ahulikitinitamó nene, goha veló vamiki hanuva minino, itó lá amiki váinigi goha apiziki minino. Itó ve keza venáini ahulikitamino.

¹²Vegená lugáatini gakó litoze. Gilikiko, Guivahanímo lokago alika geleake nolihe liki gelemilo. Negepa ale vávani okago nololeketuve. Izesukumú gele alévolé onoiti ve makolímíni venala eza monó gelemi vená minatimó nenémo vanagi apizeko minatíive loko gelekikoma, vanámo amisele ahulotamino. ¹³Itó Izesukumú gele alévolé onoiti vená makolímíni vana eza monó gelemi ve minatimó nenémo venalagi apizeko minatíive loko gelekikoma, venalámo amisele ahulotamino. ¹⁴Monó gelema ve nene venáinilokatí lusa nenémo keزالokagi voko aleneive. Itó monó gelema vená nene váinilokatí lusa nenémo keزالokagi voko aleneive. Lá noigo, gipa mohóini nene lusaninigi lilí iki niave. Keitoka lusa minamilina, izegipáini nene monó gelema vegená minaline. ¹⁵Lá onoimóza, monó gelemíti vémohe itó monó gelemíti venalímohe vanahe itó venalahe ahulotoko vitove loko nolikoma, géneka lamilo. Ómasímo geha ziki apiziki minatave loko sele lo limimóma nenazo, nagá zeko ale

^a 7:11 Mat 5:32, 19:9; Mak 10:11-12; Luk 16:18

minatunimó nomive. ¹⁶ Vená geza vakagi apiziki minatáimó nene, monó gapogú nene vaka alémoko atape, amitane. Nenéa gelenape, olo. Itó ve geza venakagi apiziki minatáimó nene, venaka nene monó gapogú alémoko atape, amitane. Nenéa gelenape, olo.

Guivahanímo iki miliki minatave loko loletamó nenegukó minatune

¹⁷Lekeza etó etó iki nene Guivahanímo iki miliki minatave loko loleketamó itó Ómasímo sele lo likimi zupa iki miliki miniaká a mogonaló nenegukó monokú minino. Neza numutó namató Izesuni vegenala zuha gakó lo kemeko némika loko lo hukoaká nouve. ¹⁸Vegená makó nene Ómasímini anosa kugupeló milikimikago niago Guivahanímo sele lo kemekago imi nitamó nenete ámina anosa ahulata gapomú vitagá amitaze. Itó vegená makó nene kugupeló Ómasímini anosa nomimó niago Guivahanímo sele lo kemekago imi nitamó nenete ámina anosamú voká lamitaze. ¹⁹Ómasímini anosa aliki minatamó itó anosa nomimó minatamó nenémo netá gihila nomive. Ómasímini agepagutí gakó gili aliki minatamó nenémo gihila neve. ²⁰Vegená lekeza nanámini mogonaló iki miliki niago Ómasímo sele lo likimimó nehe. Ámina mogonalokó minalo. ²¹Geza megusa izegipa loló oko noako Ómasímo sele lo gemeneitimó nenemú gagata losi gelemoko áminagukó minozo. Itó megusa izegipa loló oko minoko hoza aleaká noanikutí gologí ogetatune liki nilikoma, géneka lamo. ²²Vegená makó nene megusa izegipa lilí iki niago Guivahanímo sele lo kemeneitimoláa keza Guivahanímo lihimáikutí apasoketa vegená niave. Itó ámináminoko vegená makó nene hanuva niago Guivahanímo sele lo kemeneitimoláa keza Kilistoni megusa izegipa lilí iki niave liki gili minalo. ²³Izesú eza lekélí meina hizeneimóma neve. Nenemú mikasiuka vegenalitini gopoguni miliki gelekelé ikitamiki Izesunigó gelekelé itiki minalo. ²⁴Nigivénegita, lekeza etó etó iki gozapá nanámini mogonaló iki miliki niago Ómasímo sele lo likimimó nehe, ámina mogonalokó itína gamenagi Ómasiloka gímiziki minalo.

Mohoki getó venaki keí gakó

²⁵Itó veló vama venakumú nene Guivahanímini agepagutí gakó alenamumóza, Guivahanímo agika hize nemekago monónegi loló oko nouke, nezáne nagata nogulu gakó lo likimitomó neneló lekeza leheta itave loko noguluve. ²⁶Itína gamena nene golesa netalímini agikagú nounike lugupe gasova okago noune. Nenemú ve makó keza vená alemiki gohuna minatamó nenemú gelekugo lamaná inogo ive. ²⁷Vená aleneitanimó nene, ahulatove loko gelemo. Itó vená alemoko hanuva noitanimó nene, venakumú gelemo. ²⁸Itó vená alitanimó nene golesa aminogo ive. Itó hanuva noiti vená makolímó veló vitimó nene golesa aminogo ive. Lá

onoimóza, ve aleve keza lugupémuni netakumukó giliki miluma giliki minanigave. Itó neza nenémuni gelehusigutí akagá oleketatove loko noluve.

²⁹Nigivénegita, gakó imane lo nolukumumó nenémuni mogona lá oko neve: Ómasímo mola gamena mota alitokave. Itó gelekelé otatuni gamena mota alínipa okanazo, venaki ve lekeza Guivahanímuni hozagú iki miliki itamó nene ve aleve lilí amamó giliko minalo. ³⁰Itó ive nama iaká nia vegená lekeza iki miliki itamó nene ive nama amamó giliko minalo. Itó lokogoliza viziaká niamó lekeza iki miliki itamó nenémo lokogoliza vizemamó giliko minalo. Itó netá matá meina kona iki miniaká niamó nenémo henokanotini nomimó giliko minalo. ³¹Itó nosá molosaka liaká niamó nene lá amamó gelekiko minalo. Mikasi imane luhuvagi nego ángoko geleaká nouháza, mota vo tolova inogo ive. Nenemú gakó imane noluve.

³²Lekeza nene ha netakumú mulutini itemiko minatave loko gelenouke noluve. Gohuna ve nenete Guivahanímuni hozamú giliki minanigave. Miniki Guivahanímó gelekiko lamaná itive likigó iki miliki inigave.

³³Venaki ve nenete lugupémuni netakumú gilinigave. Lá niiki venáinite giliko lamaná itive likigó iki miliki inigave. ³⁴Lá iake kagata losi giliki miniaká niave. Itó áminagó iki vená mohó getó keza Guivahanímuni hozamukó giliki minanigave. Lá niiki kigika kugupe Guivahanímuni loló itive likigó iki miliki inigave. Itó vegi vená nenete kugupémuni netakumukó gilinigave. Lá iiki váinite gili lamaná itave likigó gilinigave. ³⁵Lekeza vatí iki minatave loko gakó imane lo nolukumuve. Lekelí gapo hize lí ugopa, lekeza gopa amiki likigikatini mili nupa ikiko, Guivahaniloka mukipa miniko gelekelé itatave loko noluve.

³⁶Itó ve makó eza mohola nene veló viti gamena asú inogo noikoma, itó amelaho nene ale minanogo goselé apelekikoma, veló amisilinogo nookoma, amisilitimó nene lihima aleminogo ive. ³⁷Lá itimóza, ve makó nenémo agikatunú mohóne nene hanuva minative loko gele hamó oko gilikoma, gena amiko, veló vamtive loko lo hukatimó nene etanogo ive. ³⁸Nenemú ve makó eza mohola veló vitive loko gele amitimó nene, etanogo ive. Itó makó nenémo mohola amiselemoko ale minatimó nenémo iteko neve.

³⁹Vená makolímóhe makolímóhe vanámo oko moloko ititoka ititoka oko ezaló apizeloko voko minatize. Vana helekiko nene, ve makotó vitove lokoma hanuva vitize. Lá onoimóza, gopa napa minoko nomive. Guivahanimú geleneiti veló vitive. Lá onoimóza, ⁴⁰nagata gulumó veló vamoko hanuva minatimó nene, agoliza vizeko minanogo ive. Nene není gakó nemóza, nagata gulumó Ómasímuni Sikalahú nenitoka nego noluve.

Ómai netalímuni miguhala noaká

8 ¹Itó soza ómai netalímuni miguhala niaká niamó nenemú lo likiminogo uve. Leza mukitó nene netá mogonatagana geleaká

noune liki liaká niamóza, mogona geleakaláagó gelekunike lugupe aleko iteaká noune. Ligika kemeko nasahilí oketoko minatunimó nenémo luhusate ale gilitolimikiko lamaná oko minanogo une. ²Makó keza geleakate napa neve liki litamó nene geleaká gihila makó alinamave loko litune. ³Makó keza kigika Ómasiloka mili gikí litamó keí nene Ómasímo giliko lamaná inogo ive.

⁴Nenemú soza ómai netalímini miguhala noakakumú nene láa loko geleaká noune: Ómai netá eza netá gihila nomive. Ómasi eza hamokó gihila noive. ⁵Ómasi mukí nene okulumakú itó mikasigú niave liki liaká niave. Itó ómai netá guivahani sozámuni mukí niamó gelekamóza, ⁶leza nene Ómasi ameteho hamokó noive loko gelenoune. Aitokatí netá matá mukí utó o asú onoimó, itó leza aí mututoni loló itune loko noune. Itó Guivahani hamokó Izesu Kilistó aí agizakutí netá matá mukí utó onoimó itó leza aí agizakukó noune. ⁷Lá oko nemóza, vejená lugáa keza nene mogonáa lá oko noimó nene gili guni isá amave. Itó nenémináate ómai netá eza netá gihilave liki minake, sigaga litiki minake, kigika okamóma nenazo, miguhala nake goliva gelego, genavagi loló noigo, nake kigikáini ali golesa iaká niave.

Ligivetegini kigikáini ale gopa oketamitune

⁸Ómasi eza nosánetá noaká namoakakumú giligo golesa aminogo ive. Miguhala noaká mositunimó nene gele golesa itihe. Itó nokuko gele lamaná itihe. Lá oko nomive. ⁹Hanuva lugáa lekeza lagava giliki niaká niamoláate likigivetikini kigika losi pasi i vejená kigikáini ali gopa ikimikataze, nenemú giliko gena likivisino. ¹⁰Geza matuka koló ominamó neneka, ómai netalímini numukú miguhala noko noako, gigivekaho makolímo giliko gena oaká noiti vémo áinigokoko láa loko linogo ive: Nonamole. Neza natomole. Loko lokoko nanogo ive. ¹¹Natimó nene, gigivekaho monó lagasó alenei ve Kilistó nohilike meina hizenei vema geí gigikaloka vokoko hoipa loko golesa amitimó nehe. ¹²Lekeza nenémini iaká niake, likigivetikini kigika kemeni alévolé ami vejená goihá giligili nikitake, kigika ali gopa ikimiaká niave. Kigika ali gopa ikitatamó nene, Kilistoni goihá giligili itamó gilinogo ive. ¹³Nenemú neza iza mémela nonugo, nigivéneho nenemule loko gele gopa oko lihima alekatinazo, aikumú gulugo, gena okikoma, iza mémela mose oko mininake hilitoze.

Aposolomate avevezaha a netá

9 ¹Neza nagá makokú minamuve. Nénisi vejenalitini megusa minamuve. Nénisi nene aposolo nomive liki nilahe. Nénisi nene Guivahanima áinigamuhe. Hozanémini gihiláa Guivahanímini nasahilikú utó oaká noimó nene lekelisi nene lá isá amahe. ²Nénisi nene vejená

lugáatini aposolo minamugoma, aposolo hozanémini gihiláa Ómasímini lusaló utó amoláa nene lekelisi nianazo, lekelí aposolo lamaná nouve.

³Aposolo hoza aleaká nou mogonánemú loká iaká nia vejená nene gakó imane ale viligoko láa loko lo kemeaká nouve. ⁴Aposolo lugáa keza lekelitokatí nosáneta zahí nagamí aliki niki minikago, lelikumú nene namitáive liki li hukilitatahe. ⁵Pitá itó Guivahanímini agunamotamolagi itó aposolo lugáa keza venáinigi monó hozaló nivago nosáneta kimiaká niave. Lá niago leza áminámini okogó venategi monó hozaló vitíinazo, nosáneta mosilitatamó nene etatihe, olile. ⁶Nezagi Panapasiki lezagó ligizanitunú hoza aleaká nousimó nene ali ahulatáive liki gili limitamó nene etamitihe. ⁷Gililo. Pilisí ve keza lova hizita netá kezáini moníinitunú meina hiziaká niahe. Itó ve makolímó hoza aleko zuhá itimó nene omolokiko aleko namitihe. Itó ve makolímó pulumaká iza gizapa onoitotí kef aminí namitihe. ⁸Gakó láa loko nolumó nene imane mikasiuka vejenalitini gakó nolumóza, monó gotolaú gakó makó ámináminoko utó noive. ^{9^b} Mosé lo hukoko li gakó makó láa loko lonoimóma neve:

Pulumaká nenémo hoza alegetoko méniha gihisi nanogo noikoma géneka loko agepa viseletamo.

Loko Ómasímó limó nene pulumakakumukó lamive. ¹⁰Vegená lelikumuki lo moloko limóma neve. Hozagaza aliaká niamó nenete gihila utó iko natune liki kagata losi gelemake, zuhaina iaká niamó nene etokave.

^{11^c} Leza nene lekelitoka likigikámini netá gihila nene zuhá oaká unitó meinaváa lekelitokatí lugupémíni netá alitunikumú gilikago gena okahe. ¹²Lugáa keza lekelitokatí moni henokanoni aliaká niamó nenémo etokamó nenazo, lamaná lezagi nene áminámini oko lekelitokatí alitunimó etative.

Lá onoimóza, leza apí oko hoza alunikutí emane lugupémíni netá alemuháma neve. Kilistoni gakó lamanalímini gapo hize lí omikatune loko lekelitokatí moni henoni alitave liki gili liminamóza, lá amunike ahulukunike gena aleko mohona oaká nounge.

Pauló meina nomi hoza aleko minamó nenémo gonanalivagi utó imó

^{13^d} Monó zavusave napagú hoza alemoláa keza monó zavusavegú Ómasímini avogisaló milita nosakutí niaká niave. Itó ló lónogó iake Ómasi guguni gizi amiaká nia ve keza vejenalite Ómasímini avogisaló milita netakutí ali nímaní iaká niave. Nenéa lekeza gilísá amahe. ^{14^e} Itó monó gakó lole ale ve leza ámina gakó giliaká nia vejenakutí lugupémíni lukesava alitave loko Guivahanímó lo hukoletonoimóma neve.

¹⁵Lá onoimóza, nénisi ámina vililita gapoló vosá amuve. Itó lekeza nene ámina suni alinitatave loko gelekuke luhuva imane gizamuve.

^b 9:9 Gapo 25:4; 1 Tim 5:18 ^c 9:11 Lom 15:27 ^d 9:13 Gapo 18:1

^e 9:14 Mat 10:10; Luk 10:7

Itó ve makolímo nene neza hagitana oko monó lo lekemeaká noukumú nogoliza vizeko nugupe ale oteaká noumó nene aleko lemekative loko nenemú gulugo gena okanazo, heleaká netalímo není alithe loko nenemú gulugo, vávani noive. ¹⁶Gakó lamaná lo hutilí oaká nouve. Lá noumóza, ámina hozaváa nene není numupiló molonoimóma nenazo, nenemú nugupe aleko iteko sigaga loko litomó ma lamaná aminogo ive. Izesuni gakó lamaná lo hutilí amulina, nagataló nagataló igo minuline. ¹⁷Hoza nene nezáne nagata geleko ale utó oko alulina nene, minoko meinaváa alulinamóza, nezáne nagata geleko alemumóma nenazo, mogonáa lá oko neve. Ámina hoza nene Ómasímo nemekago numupiló itekago aleaká nouve. ¹⁸Nenemú meinaváa aleaká noumó nene lá oko neve. Neza monó hozaló novuke, Izesuni gakó lamanáma meinaváa nomimó vejená lo keme keme oaká nouve. Lá uke gakó lamaná loaká nenémini meinaváa lugupémini lukesaváa alitave liki linamó nene ale ahuloaká nouve.

Pauló eza haitopaitó vejenalitini gelekeléini minamó

¹⁹Neza vejená makolitini megusáini minamumóza, vejená mukí nene Kilistotoka kelémo molatove loko gopa mukí vejenalitini gelekeléini loló oko nouve. ²⁰Zuta vejená Kilistotoka kelémo molatove loko kezagi makó minunike, Zuta vetini kemetameki loló oaká nouve. Itó nezánemú Mosé lo hukoko li gakolímini nagakú minamumóza, lo hukoko li gakolímini agizakú nia vejená nene Kilistotoka kelémo molatove loko keitoka minuke, ámina lo hukoko li gakotó gelekelé izegipa nemetamenigi loló oaká nouve. ²¹Itó Zuta vejená minamamoláa keza Mosé lo hukoko li gakó minami vejenaki makó minunike Kilistotoka kelémo molatove loko Mosé lo hukoko li gakó minami nemetameki loló oaká nouve. Nene Ómasímini avogisaló eza lo mola gakó nomive lukopa, neza Kilistó lo mola gakó gele aleaká noumole. ²²Itó vejená monó kigika amimoláa Kilistotoka kelémo molatove loko ve nenémináagi makó minunike vejená monó kigika amimoláa kemetameki loló oaká nouve. Lugáate latila inigi niago, némini manámini oloko vinake Ómasímo lugáa kugutó vizitive loko haitopaitó vejenatoka minuke, haitopaitó kemetameki loló oaká nouve. ²³Mukí netá nene hanuva Izesuni gakó lamaná utó oloko vitive loko loló oaká nouve. Lá nouke Ómasímo nónohá nozeketoko nezagi nónohá zenetative loko aleaká nouve.

Amuza moloko gonanalisi netá alitune

²⁴Lekeza láa liki gilisé amahe. Zohí oaká apató nene izegipa keza mukitó ololu liaká niamóza, netala nene hámakolímo goí oko vo anitike aleaká noive. Lekeza ámina iki Ómasilokatí gonanalisitini alitune liki ololu lilo. ²⁵Lesis ita izegipa keza amuza molatune liki apínápí iki haitopaitó avevezaha iaká niave. Keza gonanalisi netá ha netakumú

nenémini iaká niamóza, leza nene gonanalisi netá alévoleláamú nenémini itune. ²⁶Nezánegi nene ololu loaká noumó nene anosa netá alitove loko ángo hee lo minuke ololu loaká nouve. Itó neza hoza alumó nene ale satosá amuve. ²⁷Neza vejená nene monó lo keme keme oko minoko nezáne latila okatove loko nugupéne aleko lemeko nigikámo lititó ámegetative loko gizapaváa minoaká nouve.

Soza ómai netá gupá zi amiki gelekelé itamilo

10 ^{1f} Nigivénegita, leza avotege iki miliki amó nenemú gilitave loko lo likimitoze, gililo. Mosé eza Izipi mikasiukatí kelémoko novigo, keza mukitoka límúsímo molo hitokimikago vamó, itó mukitoka age nagamí likiki vamó. ²Lá niake, Moseni vejenala zuha lilí itave loko límúsímo itó age nagamilímo monó nagamí loló okago hílamo. ^{3s} Itó Sikalahulímo nosá ale utó okimikago, mukitó niki minamó. ^{4h} Itó Sikalahulímo nagamí ale utó okimikago, mukitó namó nene Sikalahulímini zámuzaló gehani nenémo kémegetoko novigo ámina gehakutí nene nagamí lemekago namó. Ámina gehani nenémini agulizá Kilistó. ⁵ⁱ Lá okamóza, Ómasímo ámina Zuta vejená lugáamú gele golesa okimikago, mikasi gomopalaló hili gesá amó.

^{6j} Itó Zuta vejenatoka netá lá oko utó imó nenémo lelí lagata alinogo utó imóma neve. Keza nene golesa netakumú mumuzó ikago, leza áminámini okatunize. ^{7k} Keikutí lugáa nenete soza saza ómai netá gupá zi amiake, némini netalímini gelekelé itiki minamó. Lekelisi nenémini amilo. Nenemú monó gotolaú nene luhuva láa liki gizinamóma neve:

Vegená keza mitó minake, nosánetá niki niki iake, otiake ómai netalímo ángo guni itive liki melekeni amó neve.

^{8l} Lá iake, mokoló netá haitopaitolímini ali utó iki minamó nenémini okatunize. Keikutí lugáa nenete ámina netá golesa ali utó iki minake, ámina zupagó vejená helemó nene 23 tausen hili gesá amó. ^{9m} Itó keikutí lugáate Ómasimú agika lamanaki ve nenazo, nosánetakúmú géneka litunimó nene gahá lememitihe liki liake gimivagú milikago, gosihá agulizá guimalite kipilikago, hili gesá amó. Lezagi lá okatune. ¹⁰ⁿ Keikutí lugáate Ómasimú gahá litigí ikago, vejená kepeleaká ageló makolímo anitike kepele gesá imó. Lezagi lá okatune. ¹¹ Keitoka netá utó imó nenémo lelí mesaha loló okaze, nene ángitune. Mikasigi okulumaki gamenaváini asú ititó noune. Gakó imane lagata aliki nene gakokumú aveté iki luhuva gizinamóma neve. ¹² Nenemú nene ve makolímo ezámú giligo monokú alévolé oaká noitimó nenémo voko golesa okatize, nenemú

^f 10:1 Gá 13:21-22, 14:22-29 ^g 10:3 Gá 16:35 ^h 10:4 Gá 17:6; Nam 20:11

ⁱ 10:5 Nam 14:29-30 ^j 10:6 Nam 11:4 ^k 10:7 Gá 32:6 ^l 10:8 Nam 25:1-16

^m 10:9 Nam 21:5-6 ⁿ 10:10 Nam 16:41-49

legesó oko minatize. ¹³Lekelitoka gimilikú moloaká nenémo utó omo itimó nene, numutó namató vejená mukitoka áminagó oko utó oaká noive. Lá onoimóza, Ómasímo lelémo vatí itove loko lokago alévolé oaká ve nenazo, gimilikú moloaká netá makolímó utó okoko lekelí zámuza avilegekoko lekehelú itimó okikoma, Ómasímo lekelémo vatí oko zámuza nolekemeko zukatoni lekelepizekiko, hanuva alévolé iki minanigave.

¹⁴Nenemú nene, nigivénegita, lugeha netá soza saza ómai netakumú mosiiki etó iki minalo. ¹⁵Lekeza likigikagi lakagatagima niave. Nenemú gakó imane litoze, lekezatini giliki ánigi hee lilo. ¹⁶^o Gonigú nene vain nagamí Ómasímo lusa geko molamó nene nonunike, Kilistoni golanímíni lusa molamó nene izá moloko aleaká nounge. Itó peleti lusa geko molamó nene nonunike Kilistoni mémelámíni lusa molamó nene izá moloko aleaká nounge. ¹⁷Lepa nosá nene hámakó peletigutí noaká nounge. Ámináminoko leza monó guluhá vejená nenete apizeko hámakó loló oaká nounge. ¹⁸^p Lekeza nene Isilae vejenalitimíni sunimú gililo. Guguni giziki nosáneta níaká nia vejenalite guguni giziaká italó viki Ómasiloka gímiziaká niave. ¹⁹Gakó nolumó nenémíni mogona lá oko neve. Ómai netalímíni miguhala níaká niamó nenémo netá gihila nomive. Itó ómai netá ezagi gihila nomimóza, ²⁰^q monó gelema vejenalite miguhala níaká niamó nene Ómasíminimú nomive. Holositini miguhala níaká niave. Nenemú nénisi nene lekezagi holosigi apizitave loko gelemuve. ²¹Lepa nosató Guivahanímíni gonigutí níiki itó holositini gonigutí níiki itamó nene, etamitive. Ámina goni lositakutí noakaláa nomive. Itó Guivahanímíni italotí níiki holositini italotí noakaláa nomive. ²²^r Guivahanímíni izapaló molative liki niahe. Ehe, lelí zámuzámo aí nene avilegenamive.

Némíni manámíni inigi Ómasímíni agulizá vitive liki lá itaze

²³^s Lekeza nene netá matá mukí nene ligika ale golesa iti netá nomigo hanuva aleakaláa neve liki liaká niamóza, mukí netá alekuko nenémo lelémo vatí aminogo ive. Netá matá mukí nene gakola nomigo hanuva aleakaláa nemóza, nene netá mukí aleloko novinake luhusate ale gilitolimiakaláa nomive. ²⁴Makó eza ezámukó gelemoko agivelahinimú gilino. ²⁵Lekeza nene lekezatikó maketilotí iza goula nosá meina hizitune likima hanuva hizitaze. Lá níikima soza saza ómai netalímíni numukutí nehe liki giliko, gena okative liki loká miká amilo. ²⁶^t Nenemú monó gotolaú luhuva láa liki gizinamóma neve:

Mikasigú netá matá mukí nemó nenémíni amelaho Guivahani áisigó noive.

^o 10:16 Mat 26:26-28; Mak 14:22-24; Luk 22:19-20 ^p 10:18 Liv 7:6 ^q 10:20 Gapo 32:17
^r 10:22 Gapo 32:21 ^s 10:23 1 Koli 6:12 ^t 10:26 Age 24:1

²⁷Liki gizinamó nenazo, mikasiuka netá mukí nene noaká netakó neve loko gilinogo une. Nenemú monó gelemi ve makolímó nosánetakumú alesa molo lekemekiko nene, numunagú ititune likima ititaze. Itikiko, nosánetá lekemekiko nene, lakagata giliko, gena amiko, gopa nalo. Gopa niniki nene holositini miguhala nehe liki loká miká amilo.

²⁸Lá onoimóza, gopa niniko nene ve makolímó imane iza nene ómai netalímíni miguhala neve loko lo utó o lekemekiko nene, ámina vemú nene giliko, gena okikoma, ahulalo. ²⁹Lekezatini likigikatini golesa itikumú nomive. Likigivetipini agika golesa okative loko noluve. Nezáne nigikamú gulugo gena ami netakumú ve makolímó ezáa agikatunú ale moloko nenikumú lokatize, nenemú ahulatove. ³⁰Neza Ómasi agepoka lokinake nosánetá natomó nenazo, Ómasi agepoka loko nato netakumú ve makolímó gele golesa oko gahá nimitimó nene etaminogo ive.

³¹Nenemú lekeza nosánetá nanigi itó zahí nagamí nanigi itó némini manámíni inigi Ómasímíni agulizá vitive liki lá ilo. ³²Lekeza Zuta vejená ahe itó Kiliki vejená ahe itó Ómasímíni vejenala zuha keí kovogisaló gili golesa ita netá nene ali utó amilo. ³³Neza ámináminoko vejená haitopaitó keza ánginimikiko etative loko minuke, nezáne netá matáne lamaná itive loko nomive. Ómasímó vejená mukí kugutó vizitive loko némini manámíni oaká nouve.

11 ¹ Neza Kilistó lisoko vi gapoló lisuke, ámegetoaká nouve. Lekeza ámináminiki není nigizakagú lisiki némegetalo.

Venalite gotóitó netá hitata gakó

²Lekeza nene oko moloko umómaloka mili giliki neza lo hutu gakó lainim-oleketumó nene ámegetiki miniaká niave. Nenemú gulugo lamaná okago lekegepoka loaká nouve. ³Itó gakó makó lokugo gilitaze, gililo. Ve nene venalitini napáa niave, itó Kilistó nene vetini napáa noive, itó Ómasi nene Kilistoni napáa noive. ⁴Nenemú ve makolímó ezáa gotolaló akilí hitonoko Ómasiloka litimope itó Ómasímíni agepagutí gakó lo utó itimó nene, Guivahani avoza hiliti netá alinogo ive. ⁵Itó vená makolímó gotolaló netá hitamoko Ómasiloka litimope, itó Ómasímíni monó gakó lo utó itimope nene, vana avoza hiliti netá alinogo ive. Lá itimó nene, mokoló vená lugáate gotóini zopova huki asú iki miniaká nia vená gilinogo ive. ⁶Nenemú vená makó nene gotolaló netá hitamoko lá okikoma nene, gotola zopova huki alínipa italo. Itó vená makó nenemú avoza helekikoma, gotola zopova aseva zekoko gó ale hitooko Ómasiloka lino. ⁷Itó ve keza nene Ómasímíni nekisa itó Ómasímíni gonanalísiva lilí inamole. Itó vená keza nene vetini gonanalísi niave. Nenemú ve keza monó lita gamenaló gotóitó netá ali hitiiki minatamó etaminogo ive. ⁸ ^w

^u 11:1 1 Koli 4:16; Pili 3:17 ^v 11:7 Apí 1:26-27 ^w 11:8 Apí 2:18-23

Ómasi eza ve nene venakutí aleko loló amive. Vená nene vegutí aleko loló imole. ⁹Ve nene venakumule loko alémo utó amive. Vená nene vemule loko alémo utó imole. ¹⁰Nenemú monó liki niago, ageló vejenalite áni miniaká nianazo, vená keza vetini gizapaló niamó nenémuni anosa nene gotótó gó ali hitiki minatamó nene etanogo ive. ¹¹Lá oko nemóza, Guivahaniló gímizekunike ve nene venalitini zámuza nianazo, itó vená nene vetini zámuza nianazo, nenemú Guivahanímuni avogisaló nene ve vená keza haitopaitolímuni minatamó nene etaminogo ive. ¹²Vená nene vegutí aleko loló onoimóma neve, itó itína gamena ve nene venakutí utó oko ve hize hutilí oko minoaká nune, itó netá mukí nene Ómasilokatí neve. ¹³Lekezatini giliki áni hee lilo. Vená makolímó gotolaló netá hitamoko Ómasiloka litimó nene, etatimó nehe. ¹⁴Itó ve makó nene gotola zopova hánagi minatimó nene etaminogo ive. Nenémuni mogona nene gozapá monó gelemake mina zupa hanuva gilinamóma neve. ¹⁵Itó venalitini gotóini zopova hána nenémo netá hitinamó gilinogo inazo, keza zopova hánagi minatakumú nene gili lamaná iaká niave. ¹⁶Makó nenémo imane gakó gele ahulanogo nookoma, láa loko gilino: Haitó suni nene lezagi Ómasímuni vejenala zuha lugáagi ma ale minamune.

Lepa nosató ali nupa iake ali gopa iki miniaká amó

¹⁷Netá makokumú gulugo golesa oaká noimó nenemú lekegepoka laminake lakagata alinake lo likimitoze, gililo. Lekeza monokumú ali nupa iake likigika mili hamó amake hizi hoú liaká niave. ¹⁸Itó monokumú ali nupa niago, lekelí likigika hoú loaká noive liki li nimikago lamaná lahe loko gelekuve. ¹⁹Itó hizi hoú lámó nene hanuvamú nomive. Lekelikutí hí vejenalite monokumú amuza miliaká niave. Keza mini utó itave loko ámina suni utó oaká noimó netive. ²⁰Itó lepa nosá nanigi ali nupa iki minake, nosá niaká niamó nene Guivahanímuni nosá nomive. ²¹Lekeza nosánetá aliki ake nelaga amake, lekezatini litá iki etó etó nikago, vejená lugáa gaúna hiliki miniaká niave, itó vejená lugáa nagamí niki niki kigika kagata gopa oaká noive. ²²Lekeza numutini nomigo lá iaká niahe. Lekeza nosánetá natune likima numutikukó nalo. Lekeza Ómasímuni vejenala zuha makó áni gago lemekago, gohogó vejená keza golesa gele netá alikimiaká niave. Nene sunimú nanave loko lo likimitove. Lekegepoka litohe. Óe, lekegepoka laminogo uve.

Lepa nosalímuni gakó

²³Neza Guivahanilokatí gakó aleko lukumumóma nene lá oko neve. Guivahani Izesú nene Zutá amimí i holugú nene peleti aleake, ²⁴Ómasi agepoka loake, gitegeko nokimike limó: Není mémela imane lekelikumule loko nolukumuve. Nenikumú gili miniki niki minalo. ²⁵* Itó nosánetá

* 11:25 Gá 24:6-8

niake, vain nagamí goni ámináminoko aleake, láa loko limó: Imane gonigú nene lo múnaheaká gakó gosohá ale alévolé oaká golaníne neve. Nata zupa zupa nene nenikumú gili miniki niki minalo. ²⁶Guivahani velesá atiginá oko amiko nene lekeza imane peleti nosaki vain nagamiki nata zupa zupa nene Guivahani hili gakó li utó utó iki li kimiaká niave.

²⁷Nenemú vejená makó keza Guivahanímini peleti nosaki vain nagamiki ali gopa iki natamó nene, Guivahanímini mémelagi golanigi ali gopa inatímini lihima alinigave. ²⁸Nenemú peleti nosaki vain nagamiki nanigi niikima, goí iki likigikagú gakó netikumú vitagá iiki nalo. ²⁹Itó vejená makó nenémo Guivahanímini agupe loló uhatímini mogona gele hee lamoko gopa natimó nene, Ómasímo lihimalamú goní otati netá nene ezáa ale utó inogo ive. ³⁰Lekelikutí lugáate lepa nosá gopa nikago, netá kiviseaká noive, itó lugáa mota hilikave. ³¹Leza mogonatemú vitagá oko lo utó moloko minutilina, Guivahanímo nene lihima lememiline. ³²Itó Guivahanímo mogonatemú lotuva legeaká noi zupa nene lelí mogona ale utó oko lagavutó zeaká noive. Monó gelema vejenaki gopa miniki golesa ikatave loko nenémini olimiaká noive.

³³Nenemú nigivénegita, lekeza lepa nosá natune liki niikima, ali nupa iki miniki vejená lugáamú kegeva iki niiko, imi asú ikiko, apí iki nalo. ³⁴Makó nenémo nosánetakumú gaúna napa helekokoma, numunauka minoko goí oko nino. Alegesá iki ali gopa ikiko lekelitoka lihima utó okatize. Itó gakó lugáa nezáne lekelitoka vinake ale hee linogo uve.

Sikalahulímo monolímíni zámuza lehizelimiaká noive

12 ¹Nigivénegita, Sikalahulímo zámuza haitopaitolímíni lehizelimiaká noimó nenémini mogonamú gili gopa ikataze, lo likimitoze, gililo. ²Lekeza gozapá monó gelema vejená niago, lakagata hizego, negi hiziaká netá ómai netá sozáaló viki gímiziaká amó. Nene mota gilinamó nenazo, ³nenémini lugáa lokugo gilitaze, gililo. Ve makó nene Ómasímini Sikalahulímo alémo vávani iko Izesuni aleko letoko laminogo ive. Itó Sikalahulímo alémo vávani amiko nene, Izesú nene Guivahaníne noive loko laminogo ive.

⁴Itó monolímíni zámuza haitopaitolímíni nemóza, Sikalahú hamokó nenémo lehizelimiaká noive. ⁵Monolímíni gelekelé hoza haitopaitolímíni nemóza, hoza amelaho Guivahani nene hamokó noive. ⁶Itó monolímíni zámuza haitopaitotunú hoza aleaká nounimóza, Ómasi hamokó nenémo lelémo vávani igo aleaká nune. ⁷Sikalahú nenémo monokú lamaná iki minatave loko monolímíni zámuza mukí nene gona moloko leme asú oaká noive. ⁸Ve makó nene Sikalahulímo alémo vávani igo gakó gele hee lo minake loaká noive. Makó nene ámina Sikalahulímogó alémo vávani igo,

† 12:4 Lom 12:6-8

asuguná gakoímíni mogona loaká noive. ⁹Itó vejená makó nene ámina Sikalahulímogó alémo vávani igo, Ómasimú gele alévolé onoikeve loko alévolé suni ale utó oaká noive. Makó nene ámina Sikalahulímogó alémo vávani igo kivisi vejená kelémo zokoaká noive. ¹⁰Itó makó nene alévolé suni alitive loko zamuza ameká noive. Makó nene Ómasímíni agepagutí gako litive loko agika agata ale koló omiaká noive. Makó nene netá matá nene Ómasilokatí nemó nomimó nenémíni mogona ánigo hee hee litive loko nene agika agata ale koló omiaká noive. Itó makó nene haitó vetini konokutí monó galinali litive loko agepa ale vávani omiaká noive. Makó eza haitó konokutí lina gakoímíni mogona ale viligoko lo kimitive loko agepa ale vávani omiaká noive. ¹¹Nenémíni zamuza mukí nene Sikalahú hamolímogó ezáa agata gilike etó etó oko gona moloko lemeká noive.

Lugupe hamó nego gelekeleváa mukí neve

¹² ^z Vegená leza lugupe nene hámakó neve, itó lugupémíni gelekelé nita netá ligisa ligizani logoka legepa logómula lagata nene mukí neve. Keza ali nupa ikago, lugupe hámakó loló oko neve. Leza Kilistotoka gímizuni vejenatoka ámináminoko neve. ¹³Sikalahú hamolímó lelitoka limike monokú lelémo nupa okago, lugupémíni suni aleko hamó loló oko nominune. Zuta vejená itó Kiliki vejená itó sihele vejená nouhaki itó minamuhaki leza mukító nene hamó Sikalahú ale mulutegú molo asú unike, hamó loló okune.

¹⁴Lugupémíni gelekelela nene hamó nomive. Mukí niave. ¹⁵Nenemú ligisa nenémo neza agizani noamuve, nenemú agupémíni nekisa minamuve loko litikumule loko lugupe ahuloake ezáagó minoakeve loko laminogo une. ¹⁶Itó lagata nenémo neza agómula minamuve, nenemú agupémíni nekisa minamuve loko lugupe ahuloake ezáagó minoakeve loko laminogo une. ¹⁷Lugupeló nene logómulagó minalina, lugupe nenémo agatamú vitagá iline. Itó lagatagó minalina, agokamú vitagá iline. ¹⁸Lá onoimóza, lá oko nomive. Ómasímó ezáa agata gele hee lo minake, lugupémíni gelekelela mukí nene hoza gako haitopaitolímíni loketamó. ¹⁹Lugupémíni nekisa hamokó minalina, lugupe nene golesa oko haha ilinamóza, ²⁰itínasa nene gelekelé netá mukí niago, lugupe nene hamó neve. ²¹Nenemú logómula nenémo geza lelí luhusate minamanize, ahulokoko vozo loko ligizani lo ameminogo ive. Itó gotote nenémo geza lelí luhusate minamanize, ahulokoko vozo loko ligisa lo ameminogo ive. ²²Lá oko nomive. Lugupémíni nekisa lugáa keé lama netá nene minamalina, leza lamaná oko minamutiline. ²³Itó lugupémíni nekisa makokumú guluko limiki niamó nene gizapa okimiaká noune. Itó lugupémíni lovoza hili netá nene asapú oko gonanalisi oaká nounimóza,

^z 12:12 Lom 12:4-5

²⁴lovoza helemi netá nene utó iki miniaká niave. Ómasímo nene lugupe ale utó ike, lugupémini nekisa limiki minamoláa nene hoza napa kimimó. ²⁵Lugupémini nekisa keza hoú liki haitopaitó minamiki lelegí iki eza gelekelé otiko eza gelekelé otiko minatave loko hoza kimimó. ²⁶Nenemú lugupémini nekisa makolímo gotá apelekiko miluma gilitimó nene, lugáa mukí keza miluma gili asú inigave. Itó lugupémini nekisa makó ali otitamó nene, lugáa mukí keza kogoliza vizi asú inigave.

²⁷Monokú nominuhatímuni mogona ámináminoko neve. Lekeza mukí ali nupa ake Kilistoni agupegitana iki minake aí vejenala zuha lilí iki niave. Itó etó etó nene aí nekisa lilí iki minake, gelekelé iki niave. ²⁸^a Ómasímo nene vejenala zuha lelitoka lá oko lelémó etó okago nune: Aposolo lelémó etó okago, lelí hoza itekave. Nenelotí lemeko Ómasímuni agepagutí gakó li utó iaká ve. Nenelotí lemeko monó lainim-ilimiaká ve, itó nenelotí alévolé suni haitopaitolímuni aliaká ve kelémó etó imó. Nenelotí lemeko kivisi vejená kilími zokiaká vegi, nasahilí ikimiaká ve, gizapa ve, itó haitó konokutí galinali li utó iaká ve kelémó etó imó. ²⁹Leza aposologó lelémó etó imó nehe. Itó Ómasímuni agepagutí gakó li utó utó vegó kelémó etó imó nehe. Itó monó lainim-ikimiaká vegó kelémó etó imó nehe. Itó alévolé suni haitopaitolímuni ali utó iaká vegó kelémó etó imó nehe. ³⁰Itó kivisi vejená kilími zokiaká vegó kelémó etó imó nehe. Itó haitó konokutí galinali li utó iaká vegó kelémó etó imó nehe. Itó haitó konokutí lina gakolímuni mogona ali viligiki li kimiaká vegó kelémó etó imó nehe. Nenéminoko nomive. ³¹Lekeza monolímuni zamuza iteko minamoláa alitune liki amuza milalo. Itó neza monolímuni zámuzatunú miniki aliki ita gapováa lamaná lekelepizitoze, gililo.

Ligika kemeko nasahilí oaká gakó

13 ¹Neza vejenalitini konokutipe itó agelogini konokutipe monó litomóza, nigika nene vejená kememoko hanuva lá itomó nene, hoko-hoko netá pelo anó nenémuni oko ha netá loló inogo ive. ²^b Itó neza Ómasímuni agepagutí gakó loakalímuni zámuzagi ve loló oko mininake, Ómasímuni asuguná gakolímuni mogona nene gele asú oko, itó mukí asuguná gakó mognamú gele asú oko minoko, itó neza gele alévolé onoko agoka makó akutoko alemó zítítímuni zámuzagi minoko nigika kememinake hanuva lá itomó nene, ha netá loló inogo ive. ³Itó netá matáne mukí gohogó ve nasahilí oketoko itó nugulizá ale otitove loko nugupe lokú ahulokoko nigika kememinake hanuva lá itomó nene, ha netá nenazo, nenémo nelémó lamaná aminogo ive.

⁴Kigika kimita vejená nenete gínikaha amiki hulu iki minanigave. Keza kemekugú namiki kezáinimú giliko itemiko kezáini kugulizá ali

^a 12:28 Epe 4:11 ^b 13:2 Mat 17:20, 21:21

oteminigave. ⁵Keza sihana netá alemiki letenaha minamiki mukahá amiki vegealitati lihima ali minamiki, ⁶netá golesámo hutilí noiko kogoliza vizemiki monó sunímo hutilí noiko mulúikú lamaná gilinigave. ⁷Kigika kimiaká vegeaná nenete genavagi netá hanuva gihinigave. Mukí netá matakumú gili alévolé ikigó minanigave. Kigikatunú Ómasímú kagata losi gelemiki ageva iki miniki monokú alévolé iki minanigave.

⁸Ligika kemeaká suni nene lutegeginogo ive. Ómasímuni agepagutí gako loaká nene asú inogo ive. Itó haitó konokutí galinali loaká nene asú inogo ive. Itó asuguná gako mogona geleaká nenegi asú inogo ive. ⁹Asuguná gako mogona geleaká itó Ómasímuni agepagutí gako loaká nounimó nene veletó agilaló neve. ¹⁰Minoko alika nene vové avetoko avasavagi netá utó noiko, veletó agilaló ne netá nene tolova inogo ive. ¹¹Neza izegipa namuni minuke, namu gako loko minumó, itó namunite giliaká kigika kagata geleko minumó. Itínasa nene olopa ve loló okuke, izegipa namunitini suni ahulokuve. ¹²Itínasa gamena geleaká noumó nene, gapokapolímo logoka legepa ale viligokago, ángo hee hee losá amunimó nenéminoko neve. Alike nene gihila lamaná logómualó utó iko, Ómasímo lelí mogonáa ángoko gele asú oaká noimó nenéminoko leza ángokoko gele hee hee loko gilinogo une. ¹³Itó miniva miniva ita netá nene Ómasímú gele alévolé oaká itó lagata losi gelemoko ageva oaká, itó ligika kemeaká nene netá losive makole nemóza, ligika kemeaká nenémo iteko neve.

Ómasímuni agepagutí gako lo utó o kemeaká nenémo iteko neve

14 ¹Nenemú lekeza vegeaná likigika kimiki nasahilí itune liki amuza milalo. Itó monolímuni zámuza makó alitune liki amuza milalo. Lá iki miniki Ómasímuni agepagutí gako li utó iakakumú gilikiko itino. ²Haitó konokutí galinali liaká nia vegealite vegeaná li kememake Ómasi li amiaká niave. Keza nene Sikalahulímo kelémo vatí igo Ómasímuni asuguná gako nilago, vegeaná lugáate gili gopa iaká niamóza, ³Ómasímuni agepagutí gako li utó iaká niamó keza vegeaná monokú kilími olotiva iaká niave, itó ali kii likimiaká niave, itó kilími hulu iaká niave. ⁴Haitó konokutí liaká nia vegealite kezáini kigikáini hizi lé imiaká niamóza, Ómasímuni agepagutí gako li utó iaká nia vegealite Izesuni vegejala zuha mukí nene monokú kilími alévolé iaká niave. ⁵Lekeza haitó konokutí galinali li asú itave loko geleaká noumóza, Ómasímuni agepagutí gako li utó itakumú gulugo itekave. Ómasímuni agepagutí gako li utó iaká nia vegeaná nenete haitó konokutí liaká nia vegeaná nene kiviligikave. Lá onoimóza, ve makolímo haitó anokutí lokikoma, Izesuni vegejala zuhatini luhusáini ale gilitoketative loko makolímo ámina lonoi gacolímuni mogona ale viligoko lo kimitimó nene hamó lelegitó minanigave.

⁶Nigivénegita, neza lekelitoka vinake Ómasímo lo utó oko lo nimi gako itó monó mogona itó Ómasímini agepagutí gako itó lainim-oleketati gako lo utó oko lo lekememinake haitó konokutikó gako lo likimitomó nene, nenémo nana oko hize lé oleketative. ⁷Hanuva netá hololopani itó gotilisa nene lamaná iki zemitamó nene, anó lupamú nana oko gilitune. ⁸Itó ami vémo pikuli nene lamaná oko huhu lamitimó nene, lova hizitave loko sele nolive liki viki ali vatí aminigave. ⁹Ámináminoko lekeza haitó konokutí gako asapulagi litamó nene, vejená lugáate mogona nana iki gilitave. Hanuvamú likago, gakatini nene hepélímo ale gopa okiko tolova inogo ive. ¹⁰Nagata gulumó numutó namató haitopaitó konó komasí nomive, itó gilituni gako kó nemóza, ¹¹hanuva neza haitó konokutí lina gako límini mogonáa makó gele gopa itomó nene, ámina gako límini amelaho nenikumú gelekiko, haitó apatotí ve loló inogo uve, itó neza ámináminoko aikumú gelekugo haitó apatotí ve loló inogo ive. ¹²Itó lekelitoka mogona ámináminoko neve. Sikalahulímini zámuza lekelitoka utó itive liki amuza miliaká niamó nene vatí oko nemóza, Izesuni vejenala zuha monokú kilími miliko, monokú luhusatini ali alévolé itave liki amuza milalo.

¹³⁻¹⁴Neza haitó konokutí Ómasiloka litomó nene nigikatunukó linogo uve. Nagata nenémo netá gihila ale utó aminogo ive. Nenemú haitó konokutí gako galinali lita vejenalite mogona ali viligiki vejená li kimitatímini zámuza alitune liki Ómasiloka lino. ¹⁵Nenemú nana itune. Nenémini uko etanogo ive. Makó zupa nene Sikalahulímo legepa ale vávani okiko haitó konokutí Ómasiloka litune, itó makó zupa nene lagatatanú gele hee noloko Ómasiloka litune. Makó zupa nene Sikalahulímo legepa ale vávani okiko haitó konokutí nama litune, itó makó zupa nene lagatatanú gele hee lonoko nama litune. ¹⁶Lá amitanimó nene, Sikalahulímo gegepa ale vávani okiko haitó konokutí Ómasi agepoka litanimó nene, geza lokako, nene sunimú gele vevesamita vejenalite geí gako gelemitamó nenazo, keza nana iki lamanale liki litave. ¹⁷Geza Ómasi agepoka gihila litanimoki, gigivekaho nene gele gopa noiko, nana oko monokú alémo alévolé itive. ¹⁸Haitó konokutí gako loaká nene nénisi likivilegeko loaká nouve. Nenemú Ómasi agepoka loaká noumóza, ¹⁹neza nenemú gulugo, gihila loló amive. Monokumule liki alegesá niko haitó konokutí gako hána hána litove lokoma hanuva litomóza, neza nenemú gelekugo lemekave. Nigika nagatatanú gele hee hee linake vejená lainim-oketanogo nene monó gako luguhasí lo kemeakakumú nene gulugo, itekave.

Monokú linigima izegipa komatini suni alemilo

²⁰Nigivénegita, izegipa komate izahuza netakumú giliaká niamó nenéminiki likigika lakagatámo izegipa komatini suni alemilo. Izegipa

komatini suni alinigima nene netá golesa alemilo. Itó gako giliki ali hee hee linigima nene, olotiva vegeñalitini suni alilo. ²¹ Monó gotolaú gako makó láa liki luhuva gizinamóma neve:

Guivahanímo láa loko nolive: Neza haitó apatotí vegeñá kelémoko okugo, keza iki imane vegeñá nene haitó konokutí neni negepagutí gako li kimitamóza, neni gako geleminigave.

²² Nenémini lugáa litoze, gililo. Haitó konokutí gako galinali loaká nenémo monó gilina vegeñakumule loko haitó suni utó osá amive. Monó gelema vegeñalite ininá itave loko neve. Itó Ómasímini agepagutí gako lo utó oko lo kemeaká nenémo monó gelema vegeñakumule loko utó osá amive. Monó gako gilina vegeñalitini luhusáini neve. ²³ Nenemú Izesuni vegeñala zuha ali nupa iki miniki mukitó nene haitó konokutí gako ganagana niliko, nene sunimú gelema vegeñá ahe itó monó gelema vegeñá ahe itiki giliiki nene, negi hizikave liki gilingigave. ²⁴ Itó lekeza mukitó nene Ómasímini agepagutí gako li utó iki niliko, monó gelemi vehe itó hetoka ve makolímóhe lekelitoka iteko monó gako gilingo ive. Lá itimó nene, lekeza mukitoka lina gako límó lihimalámini mogonala ale utó oko goní otanogo ive. ²⁵ Lá okiko, agikagú netá halá geko nemó nene utó okiko, eza pou loko mikasigú agoka hizeko ako minoko, Ómasi gupá ze ameko, Ómasi lamaná lekelitoka noive loko linogo ive.

Monokú netá mukí iki miliki itamó nene vo gunigó ino

²⁶ Nigivénegita, nenemú nana itune. Lekeza monokumú alegesá inigi niikima, lukugupegó anitísá amave. Makó nenémo monó nama aleko oaká noive. Itó makó nenémo lainim-oleketati gako aleko oaká noive. Makó nenémo Ómasímini agepagutí gako haitolímímini aleko oaká noive. Makó nenémo haitó konokutí gako galinali loaká nene aleko oaká noive. Makó nenémo haitó gako kutí lonoi gako límímini mogona loaká nene aleko oaká noive. Nene suni mukí alitamó nene, monokú luhusatini ale alévolé itune liki nenémini ilo. ²⁷ Haitó konokutí gako litamó nene mukilite lamilo. Losihe losive makolehe nenéminiki hamopamó niliko, makolímó nene mogona ale viligoko lo kimino. ²⁸ Monokumú alegesá iki niiko, ve makolímó haitó konokutí linogo nookoma, mogona ale viligoko lo kimiti ve makó nomikoma ezáagó nene makotoka minoko ezáaloka itó Ómasiloka lino. ²⁹ Itó Ómasímini agepagutí gako nene vegeñá losihe losive makolehe keza li utó iki niiko, lugáa keza nigiliki gona milatave. ³⁰ Makó nenémo noliko, Sikalahulímó nene ve makolímímini agikagú monó gako molomikiko, linogoma, goí oko li ve nene hanuva noiko lino. ³¹ Lá iki Ómasímini agepagutí gako litune likima, lekeza mukitó hanuva li asú itave. Lá iki hamopamó likiko, lugáa keza monó giliki kigika vávani itive.

^c 14:21 Isa 28:11-12

32-33 Ómasi nene ale gopa oaká netakumú amu helesá ami Ómasi noive. Netá ale hee loaká nenemú amu heleaká noi Ómasi noinazo, Ómasímini agepagutí gakó li utó ita ve nenete kezáini li utó ita gakotó gizapa iki minatave liki linamole.

Izesuni vejenala zuha lugáa nenete monokumú ali nupa niago nene, 34 vená nenete gakó lamake hanuva miniaká niave. Lekezagi áminámini ilo. Vená nenete monó gakó litave loko gele kemesá amune. Vená keza nenéminiki limiki minatave loko Mosé lo hukoko li gakokú nene neve. 35 Vená makólmo monokumú alegesá niiko gakó litimó nene, lovoza heleaká netá nenazo, vená keza netá makokumú loká inigima, hanuva numúikuka miniki váinigi kezáinigó loká ikitiko, ligili hagili itave loko noluve.

36 Nolu gakokumú géneka litamó nene, Ómasímini gakó lekelitokatí utó okago nilahe. Itó lekelisigó Ómasímini gakó gelemó nehe loko litove. 37 Lekelitokatí makólmo ezámú gelekiko, Ómasímini gakó loaká ve gihila loló itimó itó Sikalahulímini zámuzagi mina ve loló itimó nene, gakó luhuva gizo nolukumumó nene Guivahanímo lo hutamó neve loko gilino. 38 Vegená makó nenémo imane gakó gele ahulatimó nene, aí gakó gele ahulatune. 39 Nenemú nigivénegita, láa liki gililo: Ómasímini agepagutí gakó li utó itakumú amuza milalo. Haitó konokutí galinali loaká nenemú géneka likitamilo. 40 Itó monokumú alegesá iki miniki netá matá mukí iki miliki itamó nene vo lamanakó oko vo gunigó ino.

Izesú heleneikutí oti gakó

15 ¹Nigivénegita, Izesuni gakó lamaná lo lekemekugo gilinamóma goha lo likimitove. Lo lekeme lekeme ugo, alikago, lukesatini loló onoimóma neve. ²Ámina gakó ali gilitiki alinitamó nene, gili zagiaká netatini alemó zeko gopa onamitimó nene, lukugutó vizinogo ive.

^{3d} Monó gakó iteko mina gakó lo nimimokó nene lo lukumuke, láa loko lo lukumumóma neve: Kilistó nene monó gotolaú alika lá oko utó inogo ive liki li milató lelí lihimatemú hilimó. ^{4e} Helekago, gale zimikago, monó gotolaú li milató gamena losive makole galegú minoake, otopá zeko otimó. ^{5f} Oteake, goí oko Pitani utó o amimó. Nenelotí izegipala zuha 12-a keitoka utó o kimimó. ⁶Nenelotí vejenala zuha 500 keza alegesá iki niago neneló utó o kemekago, áni asú amó. Itó keikutí mukí kogómulagi ha niamóza, lugáa mota hilikave. ⁷Nenelotí agunala Zemusini utó o amimó. Nenelotí aposolo mukí utó o kimimó. ^{8g} Alika nene neza guhalehale oko nougo utó o nimimó. ^{9h} Neza aposologutí lemeko nouve. Neza Ómasímini vejenala zuha gopoguni moloko

^d 15:3 Isa 53:5-12 ^e 15:4 Age 16:8-10; Mat 12:40; Apo 2:24-32 ^f 15:5 Luk 24:34; Mat 28:16-17 ^g 15:8 Apo 9:3-6 ^h 15:9 Apo 8:3

kepeleko nougo, aposolo loló itane loko nugulizá molokago, okeha nipiligo nouve. ¹⁰Lá onoumóza, neza aposolo loló uke, není mogonáne haitolímínoko nemó nene Ómasi agika lamanakímo lokago loló okuve. Itó agika lamanakímo nenitoka satamive. Neza hoza alumó nene aposolo lugáa kivilegeko alumole. Itó hoza neza nanánétunú aluline. Ómasi agika lamanakímo nenitoka minokago alumole. ¹¹Itó neza hoza alumoki itó aposolo lugáate hoza alemoki nenémo gihila nomive. Leza monó nenéminoko lo lekemekuko, lekeza gili alévolé inamó nenémo gihila neve.

Izesú heleneikutí oteneimóma nenazo, lezagi otinogo une

¹²Kilistó nene heleneikutí otopá zeko otimó. Monó láa loko lo nolukumuko, lekelikutí lugáate helenosakutí oteminogo une liki nanamú liaká niave. ¹³Heleneitunikutí otituni gakó nene gihila minamilina, Kilistó heleneikutí otimoki nene gakó gihila minamiline. ¹⁴Itó Kilistó nene otemilina, monó noluhá nene hanuvamú lokuko, lekeza hanuvamú gili alévolé aline. ¹⁵Itó nenegó nomive. Leza Ómasimú lo nouhá nene eza Kilistoni heleneikutí alémo otimó neve loko loaká nounimóza, helenosakutí otemoaká netá nelina, Kilistoni nene Ómasímo alémo otemiline. Itó nene gakó lunimó nene Ómasiloka lo mulunike sozaló ve loló oko nounimó gililine. ¹⁶Hele vejená otemitave liki liaká niamó nene gakó gihila minalina, Kilistonigi alémo otemive lokogi gakó gihila minaline. ¹⁷Itó Ómasímo nene Kilistoni heleneikutí alémo otemive liki liaká niamó nene gakó gihila minalina, gili alévolé iaká netatini nene ha netá loló iline. Itó lihimatini nene hanuva minaline. ¹⁸Itó Kilistonimú gili alévolé iake hele vejená nene viki latila aline. ¹⁹Leza mikasiukagó imane hanuvamú Kilistokumú lagata losi gelemoko ageva oko minutilina, vejená lugáa mukilite muhelete geleline.

Helenosakutí otitunimó nene ganagana otinogo une

²⁰Itó nenéminoko nomive. Kilistó nene lamaná heleneikutí otopá zeko otike, hele vejená ale goí o kimike otimó noive. ²¹Ganá ve Atá eza heleaká netá ale utó o limike hilimó ámináminoko haitó ve makolímó helenosakutí otituni netá ale utó o limike otimó. ²²Atagegi lugupe apizekoma nouninazo, nenemú hele asú oaká noune. Ámináminoko Kilistogegi lugupe apizekoma nouninazo, galegutí ote asú inogo une. ²³Hizi letiki otitave loko lonoitokó otinogo une. Kilistó ale goí o limike oteneive. Ati gamenaló nene aí vejenala zuha leza otinogo une. ²⁴Nenelotí alika nene Izesú eza kugulizaki ve haitopaitolímíni itó Satani amuza ve keí zámuza aleko leme asú okoko, aí gizapaló nia vejená nene Ómasi amelahini agizakú molokiko, gizapa oletoko noiko, gamena lutiginogo ive. ²⁵ⁱ Itínasa nene Guivahanímó hozaváa aleko

ⁱ 15:25 Age 110:1

gizapa oletoko minoloko noviko, Ómasímo nene lova ve gala veva kelémo agisa heumauka molokiko, hozava ale asú inogo ive. ²⁶Lá okoko, lova ve gala ve makó kepele asú okoko lova ve gala vetini améipini napa nene alika apele hilinogo ive, agulizá nene heleaká netá. ²⁷Izesú lá iti netakumú monó gotolaú láa liki luhuva gizinamóma neve:

Ómasímo mukí vejenaki itó netá matá mukí nene agisauka molo asú inogo ive.

Liki lina gakó nene giliiki Ómasimuki lonoi gakó nehe liki gelemilo. Ómasímo mukí netá nene Kilistoni agisauka kelémo nupa oaká noive. Eza nene Kilistoni agisauka minaminogo ive. ²⁸Ómasímo vejená itó netá matá mukí nene gipala aí agisauka lelémo nupa okiko nouko, gipala nenémo amelahini gelekelé otanogo ive. Lá okiko, amelaho livilege asú inogo ive.

Helenosakutí oteakakumule loko genavagi hoza aleko nominune

²⁹Lekelikutí lugáate hele vejenakumule liki monó nagamí hiliaká niave. Helenosakutí oteaká netá nomitimó nene, nanamú nihilave. ³⁰Itó helenosakutí oteaká nene soza gakó minalina, neza nene gasovagi netalímini amupiló genavagi minoaká noumó nene hanuvamú minaline. ³¹Nigivénegita, Guivahanite Izesu Kilstó eza není gonanalisi minatave loko lekelémo molamó. Nenemú gelekuke, Ómasímini avogisaló láa loko noluve: Neza gamena gamena heleaká netalímo omo ávatiha okago nominuve. ³²^k Neza Epeso numutoka gasova galagitana vejená kezagi lova hizeko minuhale nene, hanuva vejenalitini gakotoka leheta onoko onoitomó nene, nana netá gihila utó o nimitive. Helenosakutí oteaká netá nomitimó nene, láa loko luko etaline: Azo hilinogo unize, itínasa nosánetá iza goula apeleko lavalona natune loko lutiline.

³³Gopa napa mihina nia vejenatoka viki gímizemilo, likilími gopa ikataze. Itó lamaná iki iki miliki ita netatini nene gopa okative. ³⁴Lekeza nene likigika otopá ziko etó iki miniki golesa netá nene lekemegeza amilo. Lekelikutí vejená lugáate Ómasímú gilísá amave. Nenemú gelekuke, lokovoza hilitive loko noluve.

Helenosakutí haitolíminoko gileleko otinogo une

³⁵Itó lugáate nene hele vejená keza nana iki otitave. Itó kugupe kovogisagi nanagitana ominamó utó itave. ³⁶Liki loká ita gakó nene negiga linigave. Lekeza netá matá ali zuhá iaká niamó nene hanuva ma golosá amive. Sikú zapava hulupa legekago, goloko iteaká noive. ³⁷Zuha netá nene haitó agupegi neve. Itó gulúvila nene haitó agupegi neve. Gihiláagó kilé ahe itó netá lugáahe zuhá oaká noune. Itó zuhá

^j 15:27 Age 8:6 ^k 15:32 Isa 22:13

okuko, goloakaláagi agilagi nene alika utó oaká noive. ³⁸Itó Ómasi eza gele vevesoake lotamole loko ametameni amimó áminaló goloko iteake o moloaká noive. Itó gihila ámina oko kemetameni haitopaitolímíni utó oaká noive. ³⁹Lugupémíni mogonáa ámina oko hamokó minamive. Vegená lelí lugupe haitó, itó iza galatini kugupe nene haitó, itó namatini nene haitó, itó lagahatini nene ámina oko haitó. ⁴⁰Itó okulumatoka netá matá mukí neve, itó mikasiloka ámina oko netá mukí nemóza, okulumatoka netá mukí nemó nene gonanaliváa haitó, itó mikasiuka netá nemó nene ámina oko gonanaliváa haitó. ⁴¹Ho nene lapanaláa haitó, ikani eza lapanaláa haitó, sonohí keza ámina oko lapanáini haitopaitó neve.

⁴²Helenosakutí oteakalímíni mogonáa ámina oko neve. Gale zeaká lugupe nene haha oakalímíni neve. Goloaká nenémo haha aminogo ive. ⁴³Gale zeaká lugupe nene hutuváa neve. Goloaká nene gonanalivagi neve. Gale zeaká lugupe nene keé lamimó neve. Goloaká nene zámuzalagi neve. ⁴⁴Gale zeaká nene mikasi lugupéa neve. Goloaká nene okulumakú lugupegi golanogo une. Mikasi lugupe nemó nene ámina oko okulumakú lugupe neve. ⁴⁵^l Monó gotolaú láa liki luhuva gizinámóma neve:

Ganá ve Atá nene sikalahulagi loló oko minoaká nenémíni amelaho loló oko minamó neve.

Itó alika Atá agulizá Izesú eza alévolé oko minoakalímíni amelaho loló oko minamó. ⁴⁶Okulumakú lugupe ale goí osá amive. Mikasigú lugupe nene ale goí okago, okulumakú lugupe nene alika utó inogo ive. ⁴⁷Ganá mikasigú ve eza nene mikasitunú loló imó, nenemú mikasigú ve minamó. Alika ve eza nene olulumakutí vema minamó. ⁴⁸Mikasiuka vegená leza mikasiukatí ve Atá mina avevezaha oko nune. Itó okulumakutí limi ve mina avevezaha oko gosohá vegená minanogo une. ⁴⁹Itó mikasiukatí vémini ametameni alunimó ámina oko alika okulumakutí limi vémini ametameni alinogo une.

Izesú anititi zupa okulumakú lugupe ale luhanogo une

⁵⁰Náa vegúe, gakó makó imane litoze, gililo. Mikasi lugupémo Ómasímíni avogisaló vaminogo ive. Itó anuva oko haha iti lugupetunú netá alévoleláa ma aleminogo une. ⁵¹^m Gililo. Neza asuguná gakó makó lo likimitoze. Leza Izesunimú gele alévolé uni vegená mukitó hilitunimó negopa logómulagi nuni vegenaki hilina vegenaki ale viligokinake gosohá lugupe nene mukitó ale luho asú inogo une. ⁵²Alika pikulima noziko, helemoláate galinali gó melevezakitana oko otiiki anuva iki haha amitamó minanigave. Itó logómulagi minatunimoláagi ale viligokinake,

^l 15:45 Apí 2:7 ^m 15:51-52 1 Tes 4:15-17

haitó lugupe ale luhanogo une. ⁵³Lugupe imane anuva oko haha oaká lugupe nene gololohá oko ale ahulokinake alévolé oko minoaká nene ginégane nenéminoko ale luhanogo une. Itó heleakalímíni mututona leza alévolé lugupe ale luhanogo une. ⁵⁴ⁿ Itó anuva oakalímó alévolé oko minoaká ale luhati zupa, gakó láa loko monó gotolaú luhuva gizonóimóma alévolé inogo ive:

Alévolé oko minoaká nenémo heleaká nene avilegeneimóma neve.

⁵⁵ ^o Avilegeake, heleaká geza lepeleaká zámuzaka hí neve. Heleaká geza gasovaka hí neve loko limó.

⁵⁶ Lihima netalímó nene heleaká netalímíni gasovala loló onóive. Itó Ómasímó lo huka gakokutí lihima netalímó helisalagi loló onóimóza, ⁵⁷Ómasi eza Guivahanite Izesu Kilistoni lomikago, netá golesa avilegeaká zámuzá lemeaká ve noinazo, nenemú agepoka litune.

⁵⁸ Nenemú náa vegúe, imane lo lekemenou gakó gili miniki alévolé iki oti vevesiki minalo. Lá niiki Guivahanimule liki hozaváa naliki, ámina hozámíni gihila voko sata aminogo ive liki gili miniki Guivahanímíni hozaló gamena gamena amuzá miliki alilíki vilo.

Izesuni vegenala zuhate moni ali nupa itave loko lo kimimó

16 ^{1p} Itó Zelusale apatoka Ómasímíni vegenala zuhate alitave liki moni ali nupa itakumú lo likimitoze, gililo. Galesia mikasiuka monó vegená lo kumumómámíniki ilo. ²Lekeza moni nalemómámíni avevezahaló gili miniki, holisi zupa zupa Sategú nene lugáa gona miliki ali etó etó iki mili-likí viki minalo. Hanuva moni ali nupa amiki gatizá niiko, vo anitekugo, moni ali nupa inigi ligitagani ikataze. ³Lekezaloka vokugo, vegená makó kilími etó inita ve nene ámina hozamú gilitave loko luhuva netá kemekoko kimiselekugo, ali nupa initatotí nene Zelusalega aliki vitaze. ⁴Itó lekeza giliko, etokikoma, nezagi makó aleko vitune.

Pauló keitoka vinogo gakó lo molamó

^{5q} Neza Masetonia mikasiuka vinogo nounazo, neneloka vinake gamena koma minokinake lekelitoka vinogo uve. ⁶Lekelitoka vinake, nenelotí nenelokahe nenelokahe vitokumú gapoló nilími vatí itave loko lekezagi gamena koma minatohe, itó hepé gamena asú itihe loko nagata noguluve. ⁷Neza itína gamena hanuva gopa novinake lekélí ánígomo vitomó nene etaminogo ive. Nenemú Guivahanímó gelekiko, lamaná noikoma lekelitoka voko gamena koma mininake vitove loko noluve. ^{8-9r} Neza nene imaneloka Epeso numutoka Guivahanímó monolímíni gapováa velekago, hoza nalugo gihila zeaká noinazo, itó monolímíni gala

ⁿ 15:54 Isa 25:8 ^o 15:55 Hos 13:14 ^p 16:1 Lom 15:25-26 ^q 16:5 Apo 19:21

^r 16:9 Apo 19:8-10

veva mukí nianazo, Sikalahú limi holisi velesá alitamigo imaneloka miní ameko minanogo uve.

^{10 s} Timotí lekelitoka vo anitekiko, Guivahanímini hoza aleaká noumó nenéminoko aleaká noinazo, agupeló gelegele okatize, lamaná oko minative liki geha zi amilo. ¹¹ Lekeza gosohá ve noive liki aikumú giliko lememino. Nezagi ligive lagave lugáagi ageva oko nounimó nenazo, lekeza legesó iki gizapa itiiki amisilikiko, geha zeko gapoló oko oko atiginá oko nenitoka atize. ¹² Itó ligiveteho Apoloni gakó litove. Ligive monó ve lugáa kezagi lekelitoka vitive loko agata aleko amiseleháza, eza itínasa vinogo vávani amive. Itínasa gopa gamena makó nene viti gapo koló okikoma, lekelitoka vinogo ive.

Pauló gekéini loketake luhuva gizo asú imó

¹³ Lekeza gizapa iki monokumú gili alévolé iki minalo. Lá niiki, lekehelele vizemiko amuza miliki minalo. ¹⁴ Itó netá matá mukí lilí inigima likigika kimiiki lilí ilo.

^{15 t} Itó nigive nagavese, gakó makó lo likimitoze, gililo. Lekeza Setepanani vená izegipala keza Akaia vejenakutí ali goí iki monó giliake, kigika ali viligamó neve liki mota gilinave. Itó monó gele vejenatoka gelekelé hoza alekogó minatune liki kagata giliaká niave. ¹⁶ Nene lekelisi nene nenémini vejená itó lilími vatí iki monó hoza aliki miluma giliaká nia vejená lugáagi ali lakamatoka milatave loko lakagata naluve. ¹⁷ Setepanaki Potunatoki itó Akaioki keza nenitoka ikago, Koliti vejená lekelikumú miluma geleko noutoka mulúnegú lamaná gelekuve. ¹⁸ Lá okuke, nezagi lekezagi mukitó keí ánigo lomala unike, mulutegú geha zimó. Lekeza ve nenémináamú giliko lamaná ino.

^{19 u} Asia mikasiuka monó gilina vejená keza lekelikumú geké nililikitago noluve. Itó Akuilako venala Piliskako itó keí numukú monokumú alegesá iaká nia vejená keza Guivahanimule liki lekelikumú geké nililikitago noluve. ²⁰ Lekezatitini monokú eza aputá viziko eza aputá viziko iki minalo.

²¹ Neza Paulona itínasa luhuva nogiza vémini agizakutí luhuva gizoaká nogosanima alekuke getetini loleketuke luhuva imane gizo asú nouve.

²² Makó eza Guivahani agika amemitimó nene, Ómasímo usí vize amekiko meikú mututoni loló itize. Guivahanite geza ano. ²³ Guivahanite Izesuni nasahilí lekelitoka mino moloko minino. ²⁴ Nigikámo Izesu Kilistonimule loko lekelitoka minoaká noive.

^s 16:10 1 Koli 4:17 ^t 16:15 1 Koli 1:16 ^u 16:19 Apo 18:2